



明達安坊刻鶴林
露徐真公舊藏

余為臨川郡從事逾年考舉粗畢侍御史葉大有忽劾余罷官臨汝書院堂長黃景亮曰鶴林維未通金閨之籍殆將增玉露之編乎余謝不敢當也還山數月是編遂成時宋淳祐壬子廬陵羅大經景綸

卷一 大悲圖記 卷三 四蟲諸賢氣象卷四 以德報怨 固覺東西

卷五 丈二尺 元載 卷六 縷慈絲

明鈔本錄小序

存六卷


序次與本不同并多九則



鶴林玉露卷之一

真正英雄

朱文公告陳同父云真正大英雄人却從戰兢臨深履薄處做將出來若是氣血粗豪却一點使不着也此論於同父可謂頂門上一針矣余觀大禹不矜不伐愚夫愚婦皆謂一能勝予而鑿龍門排伊闕明德美功被千萬世周公不驕不吝勞謙下士而東征三年赤舄几几履讒歷變卒安周室孔子恂恂於鄉黨在宗廟朝廷似不能言者而却萊夷墮三都誅少正卯便有一變至道氣象此皆所謂真正大英雄也後世之士殘忍尅核



廬陵羅大經景綸

能聚斂能殺戮者則謂之有才。開隣罵坐無忌憚無顧
籍者則謂之有氣。計利就便善裨闔善傾覆者則謂之
有智。一旦臨利害得喪死生禍福之際鮮有不顛沛錯亂
震懼隕越而失其守者。况望其立大節弭大變撐柱乾坤
昭洗日月乎。此無他任其氣稟之偏安其識見之陋驕
恣傲誕不知有所謂戰兢臨深履薄之工夫故也。

十里荷花

孫何帥錢塘柳耆卿作望海潮詞贈之云東南形勝三
吳都會錢塘自古繁華煙柳畫橋風簾翠幙參差十萬
人家雲樹繞隄沙怒濤卷霜雪天塹無涯市列珠璣戶
盈羅綺競豪華重湖疊嶂清佳有三秋桂子十里荷花

羌管弄情菱歌泛夜嬉釣叟蓮娃千騎擁高牙乘醉
聽簫鼓吟賞煙霞異日圖將好景歸去鳳池誇此詞流
播金主亮聞歌欣然有慕於三秋桂子十里荷花遂起
投鞭渡江之志近時謝處厚詩云誰把杭州曲子謳荷
花十里桂三秋那知卉木無情物牽動長江萬里愁余
謂此詞雖牽動長江之愁然卒為金主送死之媒未足
悵也至於荷艷桂香粧點湖山之清艷使士夫流連於
歌舞嬉遊之樂遂忘中原是則深可恨耳因和其詩云
殺胡快劍是清謳牛渚依然一片秋却恨荷花留玉輦
竟忘煙柳汴宮愁

落英

楚辭云餐秋鞠之落英釋者云落始也如詩訪落之落謂初英也古人言語多如此故以亂為治以臭為香以擾為馴以慊為足以特為匹以原為再以落為萌

方朔竊酒

岳陽有酒香山相傳古有仙酒飲者不死漢武帝得之東方朔竊飲焉帝怒欲誅之方朔曰陛下殺臣亦不死臣死酒亦不驗遂得免方朔數語圓轉簡明意其竊飲以發此論蓋風武帝之求長生也

高宗眷紫巖

宋高宗嘗問張魏公卿兒想甚長成魏公對曰臣子拭年十四脫然可與語聖人之道及隆興初張魏公督師

南軒以內機入奏引見于德壽宮首問魏公知居飲食狀又問卿幾歲對曰臣年三十一又問卿母否對曰久失所恃上愀然久之曰朕記卿父再娶時以無繼嗣曾來商量卿父曾奏欲令卿來見今次方得見卿朕與卿父義則君臣情同骨肉卿行奏來有香茶與卿父為信烏乎君臣相與其恩意乃至是哉或者乃謂高宗晚年追悼明受不滿於魏公至有寧失天下不用張浚之言殆不然也

病柵詩

杜陵病柵詩曰猶含棟梁具無復霄漢志良工古昔少識者出涕淚傷賢者之老病而不獲用也又曰種榆水

中央成長何容易、截承金露盤、哀不自畏言、少不更事
之人無所涵養、而驟膺拔擢、以當重任、力綿才腐、寧危
亾而曾不知畏也、又舟中上水、遣懷詩云、篙工密逞巧
氣、若酣杯酒、歌謳互激烈、回幹明授受、善知應觸類、各
藉穎脫手、古來經濟才、何事獨罕有、蓋嘆舟人操舟尚
有妙手、而整頓乾坤、獨未見妙手也、方天寶間、杜陵少
壯之時、雖亂離瘼矣、而人才尚多、故洗兵馬行曰、成王
功大心轉小、郭相謀深古來少、司徒清鑒懸明鏡、尚書
氣與秋天香、二三豪俊為時出、整頓乾坤濟時了、又云
張公一生江海客、身長九尺鬚眉蒼、徵起適遇風雲會、
扶顛始知籌策良、蓋幸其所以支撐世變者、尚有人也、

及杜陵晚歲、八哀之詩、既作、則一時豪傑、或老或死、而
後來者、未有其人、此病柙種榆之歎、舟師妙手之歎、意
益婉而詞益哀、烏乎此、唐室所以終不振乎、宋朝元豐
間、洛陽諸老為耆英會、圖形賦詩、一時誇為盛事、而識
者悲之曰、此皆仁宗所養之君子、至是而皆老矣、升降
消長之會、過此甚可畏也、時林行己曰、天將祚其國、必
祚其國之君子、視其君子之象、多如林、則知其國之盛、
視其君子之落、如晨星、則知其國之衰、視其君子之康、
寧福澤如山如海、則知其為太平之象、視其君子之摧折、
頓挫如湍舟如霜木、則知其為衰亂之時、又曰、天將使
建中為崇寧、則不使范忠宣復相於初元、天將使宣和

為靖康則不使劉陳二忠肅愍遺於數歲皆至論也

遮莫

詩家用遮莫字蓋今俗語所謂儘教者是也故杜陵詩云已判野鶴如雙鬢遮莫隣雞下五更言鬢如野鶴已判老矣儘教鄰雞下五更日月逾邁不復惜也而乃有用為禁止之辭者誤矣

花

洛陽人謂牡丹為花成都人謂海棠為花尊貴之也亦如稱歐陽公司馬公之類不復指其名字稱號然公其品格超絕始可當此不然則進而君公退而爾汝者多矣

蘧伯玉

衛靈公與夫人夜坐聞車聲麟至闕而止過闕復有聲公問夫人曰知此為誰夫人曰此蘧伯玉也公曰何以知之夫人曰妾聞禮下公門式路馬所以廣敬也夫忠臣與孝子不為昭信節不為冥墮行蘧伯玉衛之賢大夫也仁而有智敬於事上此其人必不以暗昧廢禮是以知之公使人視之果伯玉也中庸曰君子之所不可及者其惟人之所不見乎伯玉可謂真君子矣細考論語夫子所與友者僅見伯玉一人使人於夫子而夫子問其起居則金石交情可以略見伯玉之躬行純一如此宜夫子樂與之交也夫人即南子也南子有淫行然觀其所言醇粹正大有後世老師宿儒之所不

能道者且知伯王之賢而又知伯王之所以賢何其明也。迺知以衛靈之無道，南子之淫奚而不喪者，非止仲叔圉祝鮀王孫賈輩之功而已。又知夫子之所以見南子者，蓋以見識議論如此，倘能改行或者尚可輔衛靈公。以有爲子路不說是未知夫子之心也。然南子知賢者不爲冥墮行而卒不能回光內照改其淫佚靈公，因南子之言固宜識伯王之爲忠臣矣。然卒不授之以政，信乎知善非難行，善爲難知，賢非難用，賢爲難也。

三谿詩詞

有良家女流落可嘆者。余同年李南金贈以詞曰：流落今如許，我亦三生杜牧。爲秋娘着句，先自多愁多感慨。

更值江南春暮，君看取落花飛絮。也有吹來穿繡幌，有因風飄墮隨塵土。人世事總無據，佳人命薄君休訴。若說與英雄心事，一生更苦。且盡尊前今日意，休記綠牕眉嫵。但春到兒家庭戶，幽恨一簾煙月曉。恐明年鴈亦無尋處。渾欲倩鶯留住。此詞凄婉頓挫，不減古作者。南史齊范縝謂竟陵王子良曰：人生如樹花，同發隨風而散。或拂簾幌落茵席之上，或關籬墻落糞溷之中。墜茵席者，殿下是也。落糞溷者，下官是也。此詞前闕蓋祖此說。南金自號三谿冰雪翁，尤工於詩。有江頭吟云：兒時盛氣高於山，不信壯士有饑寒。如今一杯零落酒，風雨蝕盡征袍單。側立崑奴面，鐵色楚客不言。未吹笛關山。

有月無人聲自是江頭渚花發渚花春少未得妍凝立
青山圍水天杜鵑故態不識事盡情叫入青楓煙壯士
未握邊頭槊旄頭如月幾時落如今世界不愛賢看取
青峯白雲角烏乎一歌兮歌已怨壺中無酒可續噫蓋
模擬少陵之作詞旨清婉可愛

檳榔

嶺南人以檳榔代茶且謂可以禦瘴余始至不能食久
之亦能稍_二居歲餘則不可一日無此君矣故嘗謂檳
榔之功有四一曰醒能使之醉蓋美食之則熏然頰赤
若飲酒然東坡所謂紅潮登頰醉檳榔者是也二曰醉
能使之醒蓋酒後嚼之則寬氣下疾餘醒頰解三曰飢

能使之飽蓋飢而食之則充然氣盛若有飽意四曰飽
能使之飢蓋食後食之則飲食消化不至停積嘗舉似
於西堂先生范旂叟曰子可謂檳榔舉主矣然予知其
功未知其德檳榔賦性疏通而不洩氣稟味嚴正而有
餘甘有是德故有是功也

曲端

曲端在陝西甚有威望張魏公宣撫首擢用之金人萬
戶婁室與撒離曷等寇邠州端擊敗之至白店原又大
敗之撒離曷乘高望師懼而號哭金人因目之爲啼哭
郎君後以端恃功驕恣廢不用又懼其得士心竟殺之
自端之死衆心稍離金人再戰于富平我師詐張端旗

以懼敵婁室知端已死撫掌笑曰何給我也於是盡銳力攻我師敗績自是陝西非我有矣宋淳熙間高廟配享洪景盧舉此為魏公罪迄不得侑食昔孔明斬馬謖已為失計魏公襲其事幾於自壞萬里長城至於詐張端旗尤為拙謀徒足以召敵人之笑沮我師之氣耳端亦知書嘗作詩云破碎山河不足論幾時重到渭南村昔人詩欲掛衣冠神武門先尋水竹渭南村此事也

識真少

市璞寶燕石煮簣食螻蜎識者少也

放心

孟子言求放心而康節邵子曰心要能放二者天淵懸

絕蓋放心者自放也心放者吾能放也放心者如雞豚出於埘柵不求則不得心放者如鷹隼翔於雲霄而條鏃固在吾手也衆人之心易放聖賢之心能放易放者流蕩能放者開闊流蕩者失其本心開闊者全其本心

山谷八字

余家藏山谷八大字云作德日休為善最樂摘經史語混然天成可置座右

穀菹禽獸

周禮註六穀稌黍稷粱麥苽六清水漿醴醕音醫醢音醢七菹韭菁茆葵芹落筍六獸麋鹿能麇野豕兔六禽鴈鶉鷄鳩鳩鴿五藥艸木蟲石穀

象山棋

陸象山少年時常坐臨安市肆觀碁如是者累日碁工曰官人日來看必是高手願求教一局象山曰未也三日後却來乃買碁局一副歸而懸之室中卧而仰視之者兩日忽悟曰此河圖數也遂往與棋工對棋工連負二局乃起謝曰某是臨安第一手棋凡來着者皆饒一先今官人之碁反饒得某一先天下無敵手矣象山笑而去其聰明過人如此其子弟每喜令其着棋嘗與包敏道書云制子初時與春弟頗不能及今年反出春弟之下近旬日棋又甚進春弟又少不逮矣凡此皆在其精神之盛衰耳

漢文帝葬

漢文帝以七月己亥崩乙巳葬纔七日耳與窆人之家歛手足形還葬者何以異景帝必不忍以天下儉其親此殆文帝之顧命也雖未合中道見亦卓矣文帝此等見解皆自黃老中來

臨終不亂

歐陽公問一僧曰古之高僧有去來條然者何今世之鮮也僧曰古人念上在定慧臨終安得而亂今人念上在散亂臨終安得而定公深然之此說却是正理如吾儒易箒結纓之類皆是平日講貫得明操守得定涵養得熟視生死如晝夜故能如此不亂靜春先生劉子澄

朱文公高弟也病革周益公推之曰子澄亡其慮靜春
開目微視曰無慮何澄言訖而逝

籠鳥水萍

或問杜陵詩云日月籠中鳥乾坤水上萍何也余曰此自
嘆之詞耳蓋拘束以度日月若鳥在籠中漂泛於乾坤間
若萍浮水上本是形容淒涼之意乃翻作壯麗之語東
坡雪詩凍合玉樓寒起粟光搖銀海眩生花亦此類

文章

文章一小技於道未為尊此論後世之文也文者貫道之
器此論古人之文也天以雲漢星斗為文地以山川艸木
為文要皆一元之氣所發露古人之文似之巧女之刺綉

雖精妙絢爛終可人目初無補於實用後世之文似之

尹少稷

尹穉字少稷博學工文杜門讀書不及上於仕進諸公
薦之與陸務觀同賜出身少稷言行有法又通世務時
論翕然歸重嘗論減年賞當與實歷對使孝宗用其說
至今行之後乃附麗湯思退力排張魏公以是除諫議
公論始薄之厥後貶嶺南累年蒙恩北歸周益公素與
之善便道來訪謂益公曰某三十年閉戶讀書養得少
名望思之不審所得於彼者幾何而破壞掃地雖悔何
及悵然者久之益公每舉以為士大夫之戒

陳湯論

張文潛作陳湯論末云昔者韓患秦之無厭也下令曰有能得秦王者寡人與之國大夫皆諫曰賞不可以若是其重也韓王笑曰得秦王而寡人與之國是賞有再乎且得秦王矣寡人其憂無國哉一本云昔者魏國患河其邊之臣起徙而決之趙魏王大喜賞其臣以十縣其相諫曰守邊而徙河犯官也從而賞之王之臣無守職者矣魏王笑曰子憂過矣有功於魏者有比於徙河者乎魏無二河則徙河之賞無再也二事皆切而徙河之事尤勝蓋徙河犯官有矯制之意

飛吟亭詩

世傳呂洞賓唐進士也詣京師應舉遇鍾離翁于岳陽

授以仙訣遂不復之京師今岳陽飛吟亭是其處也近時有題絕句于亭上云覓官千里赴神京鍾老相傳蓋便傾未必無心唐事業金丹一粒設先生余酷愛其旨趣蓋夫子告沮溺之意也

西為尊

四方以西為尊王者之廟太祖坐西所謂正太祖東向之位是也三昭則坐北面南故謂之昭上明也向南面之明也三穆則坐南面北故謂之穆上幽也向北面之幽也今朝廷之士群臣自皆東階而升不敢升自西階非特嫌若賓主敵體亦以西為尊也班孟堅西都賦曰左城右平左東也東則為城若世所謂蒞道乃群臣所

由登降之階也右西也西則為平而不為城也凡賓主之席主東而賓西亦所以尊賓也非謂東尊於西而使賓次主也故禮客降一等則就主人之階蓋客不敢自西階為賓主禮欲自東階隨主人而升也主人辭各乃復位蓋主入不許客然後自西階升也

唐再幸蜀

唐狄昌詩云馬嵬煙柳正依上重見鑾輿幸蜀歸泉下阿蠻應有語這回休更罪楊妃杜陵詩云朝廷雖無幽王禍得不哀痛塵再蒙蓋幽王以褒姒而致大戎之禍明皇少妃子而致祿山之變正相似也今無妃子孽矣而鑾輿乃再蒙塵何哉此其胎變稔禍必有出於女寵之外者矣是不可不哀痛而悔艾也詩意與狄昌其惻怛規戒涵甚且不露則大有逕庭矣

勤有三益

自大舜稱禹不過勤儉兩字况下於禹者可以不勤不儉乎余嘗論儉有四益勤亦有三益蓋民生在勤之則不匱一夫不耕必受其饑一婦不蠶必受其寒是勤可以免饑寒也農民晝則力作夜則頽然其寢故非心淫念無從而生晉公父文伯之母曰瘠土之民莫不向義勞也淵明詩曰田家豈不苦弗獲辭此難四體誠乃疲而無異患于是勤可以遠淫辟也戶樞不蠹流水不腐周公論三宗文王之壽必歸之無逸呂

成公釋之曰主靜悠遠博厚自強則堅實精明操存則血氣循軌而不亂收斂則精神內守而不浮是勤可以致壽考也

黃綿襖

何斯舉云壬寅正月雨雪連旬忽爾開霽閭里翁媪相呼賀曰黃綿襖予出矣因作歌以紀之此名甚新但所以作歌未甚愜人意乃更爲補作一絕句云范叙綈袍暖一身大裘只蓋洛陽人九州四海黃綿襖誰似天公賜與均白樂天詩云安得大裘長萬丈與君都蓋洛陽人

堂食

渡江初呂元直爲相堂厨每聽日食四千至蔡會之當國每食折四十餘千執政有差於是始不會食胡明仲侍郎曰雖欲伴食不可得矣

鶴林玉露卷之二

廬陵羅大經 景綸

論事任事

葉水心曰國初宰相權重臺諫侍從莫敢議已至韓琦
范仲淹始空賢者而爭之天下議論相因而起朝廷不
能主令而勢始輕雖賢否邪正不同要為以下攻上為
名節地可也而未知為國家計也然韓范既以此取勝
及其自用事臺諫侍從方襲其迹朝廷每有一事則是
非鋒起譁然不安昔鄭子孔為載書諸司門子弗順將
殺之子產止之人請為之焚書子孔不可子產以為眾
怒難犯專欲難成迄焚而後定然及子產自為相却不

知此直云禮義不愆何恤人言蓋韓范之所以攻入者
卒其所以受攻而無以處此是以雖有志而無成也至
如歐陽修先爲諫官後爲侍從尤好立論士之有言者
皆依以爲重遂以成俗及濮園議起未知是非所在而
傾國之人回戈向之平日盛美一朝隳損善人君子化
爲仇敵然則歐陽氏之所以攻之者亦其所以受攻而
不自知也水心之論如此余謂國初相權之重自藝祖
鼎鑄有耳之說始趙韓王定混一之謀於風雪凌厲之
中銷跋扈之謀於杯觴流行之際真社稷臣矣雷德驥
何人乃敢議之宜藝祖之震怒也乃若持盈守成之時
則權不可以自重亦不可以過重東坡所謂姦臣之始

以臺諫折之而有餘及其既成以干戈取之而不足則
臺諫侍從之敢言乃國勢之所恃以重也豈反因此而
勢輕哉水心之說蓋張方平之遺論也方平之論前輩
固已深闢之矣范公當國不久韓公當國時最被司馬
溫公激惱然韓公包容聽受無幾微見於顏面常朝一
不押班王陶至便指爲跋扈而公亦無愠色蓋已爲侍
從臺諫則能攻宰相之失已爲宰相則能受侍從臺諫
之攻此正無意無我已一視之道實賢人君子之盛
德亦國家之美事也豈有已則能攻入而入則不欲其
攻已哉諺云喫拳何似打拳時此言雖鄙實爲至論惟
歐陽公爲諫官侍從時最號敢言及爲執政主濮園稱

親之議諸君子譁然起而攻之而歐陽公乃不能受人之攻執之愈堅辯之愈激此則歐公之過也公自著濮議兩篇其間有曰一時臺諫謂因言得罪猶足取美名是時聖德恭儉舉動無差兩府大臣亦各無大過未有事可以去者惟濮議未定乃曰此好題目所謂奇貨不可失也於是相與力言歐公此論却欠反思若如此則前此已爲諫官侍從時每事爭辯豈亦是貪美名求奇貨尋好題目耶余嘗作濮議詩云濮園議起沸烏臺傳語歐公莫怨猜須記上坡持橐日也曾尋探好題來

告命

告命自九品而上角軸二等以大小別之此其卑也染

牙以爲經凡五等陞朝歷數而上也而穗舛爲尊錦標其端凡四等而細毬之錦配稔章告身皆制綾爲之玳瑁軸素繪二等而繪爲尊告身五綵而又有紫絲法錦囊其外其小異者錦之紅綠耳犀軸亦二等藻繪雖同而大小有別三品通用也絲囊如玳瑁而錦標又不同告身亦如之而加以金縷此人臣一品之極也宮掖之嚴帝姬之親大略七等鐫犀爲軸琀玉以爲龍告身五綵絲囊幪首純紅而繪如琀玉者最高以近君也犀軸絲囊爲最高而繪皆雲鳳者次之玳瑁者又次之繪事如玳瑁而告紙 其三者又次之自此而下三等皆紫絲法錦雖有差次始寢卑矣宰相親王贈封視紫絲高

者執政贈封視次者其上四等明者尊不敢邇也絲囊之制以小鈴十繫之按式名曰帔鍔黃金塗金白金三等外庭之繫惟白金耳侍從庶僚所封視其官蕃官祠宇所封從其秩合而陳之二十有八等品位愈高則物采愈華此游默齋所記宋朝之制甚詳明

方士傳

范曄作東漢史爲方士立傳如左慈之事妖怪特甚君子所不道而乃大書特書之何其陋也曹子建辨道論曰世有方士吾王悉所招致甘陵有甘始廬江有左慈陽城有郗儉善辟穀悉號數百歲所以集之魏國者誠恐此人挾姦宄以欺衆行妖惡以惑民豈復欲觀神仙

於瀛洲求安期於邊海釋金輅而顧雲輿棄文驥而求飛龍哉子建此論其識過范曄遠矣漢武帝刻意求仙至以愛女妻方士可謂顛倒之極末年廼忽悔悟曰世豈有仙者節食服藥差可少病耳此論却甚確近時劉潛夫詩云但聞方士騰空去不見童男入海回無藥能令炎帝在有人曾哭老聃來

三足記

盧景亮言足食足兵而人才足用則天下不難理矣著論曰三足記

不談風月

范旂叟爲廣西憲會僚屬小酌曰今日之集非特不談

風月亦且不論文章只說政疵民病衆皆唯。余從容
曰若談夫子孟軻之文章以澆光風霽月之胸次則民
吾同胞物吾同與也痒痾疾痛舉切吾身施之有政當
有本末先後而民病庶乎有瘳矣旂叟其喜不以爲忤
旂叟號西堂先生開明練達遇事如破竹性剛介有不
可必達其意而後止在廣西歲餘丐祠歸養親發奏牘
之日即出臺治寓僧舍不請俸給錢將漕湖南總所專
人來索錢在庭咆哮無禮命杖而黥之既畢上章自劾
乞歸田里總所迄不敢害朝廷爲頒召命然竟卒於湖
南其將卒也請僚屬入卧内命吏取按牘來據榻判結
數事既畢又曰某縣有母訴其子者此關係風教不可

不施行命取來又判訖畧言及身後事與僚屬揖別須
臾已逝矣其精爽不亂如此有對越集百卷行于世皆
其歷任判斷之語也近年門生故吏合辭請于朝特謚
清敏余初任爲容南法掾纔數月偶留帥幕旂叟忽袖
中出職狀一紙畀余一辭以未書一考不當受旂叟曰
固也子亦漫收之若書一考而某未以罪去則可以放
散不然亦聊見某具一隻眼耳又曰非特不必以詩文
相惠明日亦不必到客位因言近日來諛風可羞長官
招僚屬一杯其初招也則有所謂謝請其既畢也又有
所謂謝會一杯之酒兩至客位行之者不以爲耻此何
等風俗耶小官不足貴推其原皆由長官無見識妄首

尊大遂成此風此雖小事然摧壞小官氣節關係却大

解胥

周禮庖人共祭祀之好羞鄭康成注云好羞謂四時所謂膳食若荊州之鱖魚揚州之鱓胥陸德明音釋云鱓醬也山谷詩云鱓胥與竹萌乃不羨羊腔

用兵

或曰用兵之法殺人如殺艸使錢如使水余曰軍無賞士不往軍無財士不來使錢如使水可也乃若殺人如殺艸則非至論夫軍士固以嚴濟然禮樂慈愛戰所蓄也所以不得已而誅不用命者蓋一有逗撓亂行則三軍暴骨矣誅一人所以全千萬人豈以多殺為能以嗜

殺為貴哉若如所言則趙克國王忠嗣曹彬反不若白起輩矣

文章有體

揚東山嘗謂余曰文章各有體歐陽公所以為一代文章冠冕者固以其溫純雅正藹然為仁人之言粹然為治世之音然亦以其事合體故也如作詩便幾及李杜作碑銘記序便不減韓退之作五代史記便與司馬子長並駕作四六便一洗崑體圓活有理致作詩本義便能發明毛鄭之所未到作奏議便庶幾陸宣公雖游戲作小詞亦無愧唐人花間集蓋得文章之全者也其次莫如東坡然其詩如武庫矛戟已不無利鈍且未嘗

作史藉令作史其淵然之光蒼然之色亦未必能及歐公也曾子固之古雅蘇老泉之雄健固亦文章之傑然皆不能作詩山谷詩騷妙天下而散文頗覺瑣碎局促渡江以來汪孫洪周四六皆工然皆不能作詩其碑銘等又亦只是詞科程文手段終乏古意近時真景元亦然但長於作奏疏魏華甫奏疏亦佳至作碑記雖雄麗典實大槩似一篇好策耳又云歐公文非特事々合體且是和平深厚得文章正氣蓋讀他人好文章如喫飯八珍雖美而易厭至於飯一日不可無一生喫不厭蓋八珍乃奇味飯乃正味也

辛卯火

宋紹定辛卯臨安之火比辛酉之火加五分之三雖太廟亦不免而史丞相府獨全洪舜俞詩云殿前將軍猛如虎救得汾陽令公府祖宗神靈飛上天可憐九廟成焦土時殿帥乃馮掇也人言籍々迄今不免責

蘄王夫人

韓蘄王之夫人京口倡也嘗五更入府伺候賀朔忽於廟柱下見一虎蹲卧鼻息斂々然驚駭亟走出不敢言已而人至者衆復往視之乃一卒也因疏之起問其姓名爲韓世忠心異之密告其母謂此卒定非凡人乃邀至其家具酒食卜夜盡懽深相結納資以金帛約爲夫婦蘄王後立殊功爲中興名將遂封兩國夫人蘄王嘗

邀兀木於黃天蕩幾成擒矣一夕鑿河道去夫人奏疏
言世忠失機縱敵乞加罪責舉朝爲之動色其明智英
偉如此

少陵可殺

宋乾道間林謙之爲司業與正字彭仲舉遊天竺小飲
論詩談到少陵妙處仲舉微醉忽大呼曰杜少陵可殺
有俗子在鄰壁聞之通告人曰有一恠事林司業與彭正
字在天竺謀殺人或問所謀殺者爲誰曰杜少陵也不
知是何處人聞者絕倒喧傳縉紳間余謂此言亦不足
恠若曹操之於楊德祖隋煬之於薛道衡蓋真殺之也

姜白石

姜堯章學詩于蕭千巖琢句精工有詩云夜暗歸雲繞
柁牙江涵星影鴈團沙行人悵望蘇臺柳曾與吳王掃
落花楊誠齋喜誦之嘗以詩送江東集歸誠齋云翰墨
場中老斲輪真能一筆掃千軍年々花月無虛日處々
江山怕見君箭在的中非爾力風行水上自成文先生
只可三千首回施江東日暮雲誠齋太稱賞謂其家嗣
伯子曰吾與汝弗如姜堯章也報之以詩云尤蕭范陸
四詩翁此後誰當第一功新拜南湖爲上將更差白石
作先鋒可憐公等皆癡絕不見詞人到老窮謝遣管城
儂已晚酒泉端欲乞疏封南湖謂張功父也堯章自號
白石道人潘德久贈詩云世間官職似撈蒲采到枯松

亦大夫白石道人新拜號斷無繳駁任稱呼時黃巖老亦號白石亦學詩於千巖詩亦工時人號雙白石云

玉山知舉

宋淳熙中王季海爲相奏起汪玉山爲大宗伯知貢舉且以晝速其來玉山將就道有一布衣之友平生極相得屢黜於禮部心甚念之乃以書約其胥會于富陽一蕭寺與之對榻夜分密語之曰某此行或者典貢舉當特相牢籠省試程文易義冒子中可用三古字以此爲驗其人感喜玉山既知舉搜易卷中果有冒子內用三古字者遂徑批上置之前列及折號乃非其友人也私竊恠之數日友人來見玉山怒責之曰此必足下輕重

利名售之他人何相負乃如此友人指天誓曰曰某以暴疾幾死不能就試何敢漏泄於他人玉山終不釋然未幾以古字得者來謁玉山因問之曰老兄頭場冒子中用三古字何也其人泯默久之對曰茲事甚恠先生既問不敢不以實對某之來就試也假宿于富陽某寺中與寺僧閒步廡下見室下一棺塵埃漫漶僧曰此一官員女也殯于此十年矣杳無骨肉來問又不敢自葬之因相與默然是夕夢一女子行廡下謂某曰官人赴省試妾有一語相告此去頭場冒子中可用三古字必登高科但幸勿相忘使妾朽骨早得入土既覺甚恠之遂用其言果叨前列近已往寺中塋其女矣玉山驚嘆

此事馮此山可久爲余言雖近於語恠然亦不可不傳
足以祛人二蔽一則功名富貴信有定分有則鬼神相
之無則雖典貢舉者欲相牢籠至於場屋亦不能入此
豈人之智巧所能爲乎一則人發一念出一言雖昏夜
暗室人所不知而鬼神已知之矣彼欲自欺於冥冥之
中而曰莫予云觀者又惑之甚者也

御史八字

宋隆興初張真父自殿中侍御史除起居郎孝宗玉音
云張震知無不言皆當理令載之訓詞大哉王言真
臺諫之金科玉條也

老卒回易

張循王之兄保嘗怨循王不相援引循王曰今以錢十
萬緡卒五千付兄要使錢與人流轉不息兄能之乎保
默然久之曰不能循王曰宜弟之不敢輕相援引也王
嘗春日遊後圃見一老卒卧日中王蹴之曰何慵眠如
是卒起聲喏對曰無事可做只得慵眠王曰汝會做甚
事對曰諸事薄曉如回易之類亦粗能之王曰汝能回
易吾以萬緡付汝何如對曰不足爲也王曰付汝五萬
對曰亦不足爲也王曰汝需幾何對曰不能百萬亦五
十萬乃可耳王壯之予五十萬恣其所爲其人乃造巨
艦極其華麗市美女能歌舞音樂者百餘人廣收綾錦
奇玩珍羞佳果及黃白之器募紫衣吏軒昂閒雅若書

司客將者十數輩卒徒百人樂飲逾月忽飄然浮海去
逾歲而歸珠犀香藥之外且得駿馬獲利幾十倍時諸
將皆缺馬惟循王得此馬軍容獨壯大喜問其何以致
此曰到海外諸國稱大宋回易使謁戎王餽以綾錦奇
玩爲招其貴近珍羞畢陳女樂迭奏其君臣大悅以名
馬易美女且爲治舟載馬以犀珠香藥易綾錦等物餽
遺甚厚是以獲利如此王咨嗟褒賞賜予優厚問能再
往乎對曰此戲也再往則敗矣願仍爲退卒老園中嗚
呼觀循王之兄與浮海之卒其智愚相去奚翅三十里
哉彼卒者頽然甘寢苔堦花影之下而其胸中之智圓
轉恢竒迺如此則等而上之若伊呂管葛者世亦豈盡

無也哉特莫能識其人無繇試其蘊耳以一弊衣老卒
循王慨然捐五十萬緡昇之不問其出入此其意度之
恢弘固亦足以使之從容展布以盡其能矣勾踐以四
封之内外付種蠡漢高皇捐黃金四十萬斤於陳平由
此其推也蓋不知其人而輕任之與知其人而不能專
任皆不足以有功視其一往之後辭不復再又幾於知
進退存亡者異哉

罰却倚子

百官殿門侍班幙次臺諫皆設倚餘官則各以交牀自
隨周益公自殿院除起居郎徐淳立戲曰罰却倚子矣

諸侯藩鎮

春秋之時天王之使交馳於列國而列國之君如京師者絕少夫子謹而書之固以正列國之罪而端本澄源之意其致責於天王者尤深矣唐之藩鎮猶春秋之諸侯也杜陵詩云諸侯春不貢使者日相望蓋與春秋同一筆

無官御史

太學古語云有髮頭陀寺無官御史臺言其清苦而鯁亮也宋嘉定間余在太學聞長上同舍言乾淳間齋舍質素飲器止陶瓦棟宇無設飾近時諸齋亭榭簾幙競爲靡麗每一會飲黃白錯落非頭陀寺比矣國有大事讜論間發言侍從之所不敢言攻臺誅之所不敢攻由昔迄今偉節相望近世以求非無直言或陽爲矯激或

陰有附廉亦未能純然如古之真御史矣余謂必甘清苦如老頭陀乃能據鯁亮如真御史

邵蔡數學

濂溪明道伊川橫渠之講道盛矣因數明理復有一邵康節出焉晦庵南軒東萊象山講道盛矣因數明理復有一蔡西山出焉昔孔孟教人言理不言數然天地之間有理必有數二者未嘗相離河圖洛書與危微精一之語並傳邵蔡二子蓋將發諸子之所未言而使理與數粲然於天地之間其功亦不細近年以來八君子之學固人傳其訓家有其書而邵蔡之學則幾於無傳矣

松竹句

杜陵詩云新松恨不長千尺惡竹應須斬萬竿言君子之孤難扶植小人之多難驅除也烏乎世道至於如此亦可哀矣

諸葛成何事

唐薛能詩云山屐經過滿徑蹤隔溪遙見夕陽春當時諸葛成何事只合終身作卧龍王荆公晚年喜誦之然能之論非也孔明之出雖不能掃清中原吹火德之灰然伸討賊之義盡託孤之責以教萬世之為人臣者安得謂之成何事哉荆公誦此蓋以自喻然孔明開誠心布公道集謀慮廣忠益其存心無愧伊呂出師未捷身先死此天也荆公剛復自任新法煩苛毒流四海不忍

君子之見排甘引小人以求助卒為其所擠陷此豈天也哉自古隱士出山第一箇是伊尹第二箇是傅說第三箇是太公第四箇是嚴陵第五箇是孔明第六箇是李泌皆為世間做得此事雖以四皓之出或者猶議其安劉是成劉况如樊英輩者乎

憂樂

吾輩學道須是打疊教心下快活古曰無悶曰不愠曰樂則生矣曰樂莫大焉夫子有曲肱飲水之樂顏子有陋巷簞瓢之樂曾點有浴沂詠歸之樂曾參有履穿肘見歌若金石之樂周程有愛蓮觀艸弄月吟風傍花隨柳之樂學道而至於樂方能真有所得大槩於世間一

切聲色嗜好洗得淨一切榮辱得失看得破然後快活
意思方自此生或曰君子有終身之憂又曰憂以天下
又曰莫知我憂又曰先天下之憂而憂此義又是如何
曰聖賢憂樂二字並行不悖故魏鶴山詩云須知陋巷
憂中樂又識耕莘樂處憂古之詩人有識見者如陶彭
澤杜少陵亦皆有憂樂如採菊東籬揮杯勸影樂矣而
有平陸成江之憂步屨春風泥飲田父樂矣而有眉攢
萬國之憂蓋惟賢者而後有真憂亦惟賢者而後有真
樂不以憂而廢憂亦不以樂而忘

鶴林玉露卷之二

鶴林玉露卷之三

廬陵羅大經 景綸

聖賢豪傑

朱文公云豪傑而不聖賢者有矣未有聖賢而不豪傑
者也陸象山深以其言為確論如周公兼夷狄驅猛獸
滅國者五十孔子却萊人墮三都誅少正卯是甚手段
非大豪傑乎其次如諸葛孔明議論見識力量規模亦
真豪傑惟房次律聲譽隆洽一出便敗事然至今儒者
之論皆稱其賢如此則是天下有不豪傑之聖賢矣宋
端平間貞西山叅大政未及有所建置而薨魏鶴山督
師亦未及有設施而罷臨安優人裝一儒生手持一鶴

別一儒生與之解后問其姓名曰姓鍾名庸問所持何物曰大鶴也因傾蓋懽然呼酒對飲其人大嚼洪吸酒肉靡有孑遺忽顛仆于地群數人曳之不動一人乃批其頰大罵曰說甚中庸大學喫了許多酒食一動也動不得遂一笑而罷或謂有使其爲此以姍侮君子者京尹乃悉黥其人余謂優人之姍侮君子誠可罪也西山鶴山之抱負誠未可厚誣也然吾儒於此亦不可以不戒劉平國嘗言若將真景元與余景瞻並用必有可觀余嘗疑其說西山負一世之望豈必待余景瞻而後可以有爲乎世傳洪舜俞在蜀嘗謂崔菊坡曰先生豐於德而嗇於才他日不宜獨當重任菊坡深然之故晚年

力辭宰輔此說余尤疑之若分才德爲兩事則是天下果有不豪傑之聖賢矣

婺州鷹巢

婺州：治古木之上有鷹巢一卒探取其子郡守王慶龍方據按視事鷹忽飛不攫一卒之中以去已而知其非探巢之卒也啣巾來還乃徑攫探巢者之中而去太守推問其故杖此卒而逐之禽獸之靈識如此其攫探巢者之中固已異矣於誤攫他卒之中復啣來還尤爲奇異世之人舉動差謬文過遂非不肯認錯者多矣夫子所謂可以人而不如鳥乎

茶瓶湯候

余同年李南金云茶經以魚目湧泉連珠爲煮水之節然近世瀹茶鮮以鼎鑊用瓶煮水難以候視則當以聲辨一沸二沸三沸之節又陸氏之法以未就茶鑊故以第二沸爲合量而下未若以今湯就茶甌瀹之則當用背二涉三之際爲合量乃爲聲辨之詩云砌蟲唧、萬蟬催忽有千車捆載來聽得松風并澗水急呼縹色綠瓷杯其論固已精矣然瀹茶之法湯欲嫩而不欲老蓋湯嫩則茶味甘老則過苦矣若聲如松風澗水而遽瀹之豈不過於老而苦哉惟移甌去火少待其沸止而瀹之然後湯適中而茶味甘此南金之所未講者也因補以一詩云松風檜雨到來初急引銅瓶離竹爐待得聲

聞俱寂後一甌春雪勝醍醐

吾無隱乎爾

黃龍寺晦堂老子嘗問山谷以吾無隱乎爾之義山谷詮釋再三晦堂終不然其說時暑退涼生秋香滿院晦堂因問曰聞木犀香乎山谷曰聞晦堂曰吾無隱乎爾山谷乃服晦堂此等處誠實脫洒亦只是曾點見解却無顏子工夫此儒佛所以不同

蝗

蝗纔飛下即交合數日產子如麥門冬之狀日以長大又數日其中出如小黑蟻者八十一枚即鑽入地中詩註謂螽斯一產八十一子者即蝗之類也其子入地至

來年禾秀時乃出旋生翅羽若臘雪凝凍則入地愈深
或不能出俗傳雪深一尺則蝗入地一丈東坡雪詩云
遺蝗入地應千尺是也蝗災每見於大兵之後或言乃
戰死之士冤魂所化雖未必然但余曩在湖北見捕蝗
者雖群呼聚噉蝗不爲動至鳴擊金鼓則聳然而聽若
成行列則謂爲殺傷沴氣之所化理或然也

曹操冢

漳河上有七十二冢相傳云曹操疑冢也北人歲增封
之范石湖奉使過之有詩云一棺何用冢如林誰復如
公負此心歲：黃曹爲封土世間隨事有知音四句是
兩箇好議論意足而理明絕句之妙也

半兩錢

今世有一樣古錢其文曰半兩無輪郭鑿方中用以爲藥
考之史記乃漢文帝時錢也當時吳淠鄧通皆得自鑄
錢獨多流傳至今不絕其輕重適中與今錢略相似視
五銖貨泉又先一二百年矣五銖貨錢比今錢却稍輕

觀山水

趙季仁謂余曰其平生有三願一願識盡世間好人二
願讀盡世間好書三願看盡世間好山水余曰盡則安
能但身到處何放過耳季仁因言朱文公每經行處聞
有佳山水雖迂途數十里必往遊焉携樽酒一古銀杯
大幾容半升時引一杯登覽竟日未嘗厭倦又嘗欲以

木作華夷圖刻山水凹凸之勢合木八片為之以雌雄
筍相入可以折度一人之力足以負之每出則以自隨
後竟未能成余因言夫子亦嗜山水如知者樂水仁者
樂山固自可見如子在川上與夫登東山而小魯登泰
山而小天下尤可見大抵登山臨水足以觸發道機開
豁心志為益不少季仁曰觀山水亦如讀書隨其見趣
之高下

占雨

范石湖詩云朝霞不出門暮霞行千里今晨日未出曉
氛散如綺心疑雨再作眼轉雲四起我豈知天道吳儂
諺云爾古來占滂沱說者類恢詭飛雲走群羊停雲浴

三豨月當天畢宿風自少女起爛石燒成香汗礎潤如
洗逐婦鳩能拙穴居狸有智蜂蟬強知時蜥蜴與聞計
埵鳴東山鸛堂審南柯蟻或加陰石鞭或議陽門閉或
云逢庚變或自換甲始刑鵠與象龍聚訟非一理不如
老農諺影響捷於鬼哦詩敢誇博聊用醒午睡此詩援
引占雨事甚詳可喜諺有云日出早雨淋腦日出晏曠
殺鴈又云月如懸弓少雨多風月如仰瓦不来自下二
說尚遺何也余欲增補二句云日占出海時月驗仰瓦體

建炎登極

宋靖康之亂元祐皇后手詔曰漢家之厄十世宜光武
之中興獻公之子九人唯重耳之獨在事詞的切讀之

感動蓋中興之一助也建炎登極之詔曰亶萬機難
以一日而曠位皇々四海詎可三月而無君又曰聖人
何以加孝朕每懷問寢之恩天子必有所尊朕欲救在
原之急嗟我文武之列若時忠義之家不食而哭秦庭
士當勇於報國左袒而爲劉氏人咸樂於愛君期一德
而一心佇立功而立事同俟兩宮之復終圖萬世之安
其詞明白亦占地步昔唐明皇幸蜀肅宗即位靈武元
次山作頌謂自古有盛德大業必見于歌頌若今歌頌
大業非老於文學其誰宜爲去盛德而止言大業固以
肅宗即位爲非矣伊川謂非祿山叛乃肅宗叛也山谷
云撫軍監國太子專胡乃趣取大物爲此皆至論今二

聖蒙塵遠狩無還期高宗不得已而即位今又出於元
祐皇后之命與唐肅宗天淵不同似亦可以無說然胡
致堂萬言書首論此事謂建炎以來有舉措大失人心
之事今欲收復人心而圖存則既往之失不可不追不
可不改一昨陛下以親王介弟受淵聖皇帝之命出帥
河北二帝既遷則當糾合義師北向迎請而遽膺翊戴
亟居尊位遙上徽號建立太子不復歸覲官闕展省陵
寢斬戮直臣以杜言路南巡淮海偷安歲月此舉措失
人心之最大者也今頃一反前失亟下詔曰繼紹大統
出於臣庶之諂而不悟其非巡狩東南出於僥倖之心
而不虞其禍今義不戴天志思雪耻父兄旅泊陵廟荒

殘罪乃在予無所逃責以此號召四海聳動人心不敢
愛身決意講武然後選將訓兵戎衣臨軍天下忠義之
士必雲合而影從凡所欲為孰不如志致堂此論明白
正大惜其說之不行也然唐肅宗即位何嘗有一人敢
言其非今致堂能言之而高宗能受之已為盛德事矣
中興以來致堂澹庵二書關係最大

江西詩文

江西自歐陽子以古文起於廬陵遂為一代冠冕後來
者莫能與之抗其次莫如曾子固王介甫皆出歐門亦
皆江西人老蘇所謂執事之文非孟子之文而歐陽子
之文也朱文公謂江西文章如歐永叔王介甫曾子固

做得如此好亦知其曠：不可尚已至於詩則山谷倡
之自為一家並不蹈古人町畦象山云豫章之詩苞含
欲無外搜抉欲無秘體制通古今思致極幽眇貫穿馳
騁工夫精到雖未極古之源委而其植立不凡斯亦宇
宙之奇詭也開闢以來能自表見於世若此者如優鉢
曇華時一現耳楊東山嘗謂余云丈夫自有衝天志莫
向如來行處行豈惟制行作文亦然如歐公之文山谷
之詩皆所謂不向如來行處行者也

以俗為雅

楊誠齋云詩固有以俗為雅然亦須經前輩鏝化乃可
因承如李之耐可杜之遮莫唐人裏許若箇之類是也

唐人寒食詩不敢用餒字重九詩不敢用餒字半山老人不敢作花詩彼固未敢輕引里母田父而坐之平王之子衛侯之妻之側也余觀杜陵詩亦有全篇用常俗語者然不害其為超妙如云一夜水高三尺強數日不可更禁當南市津頭有船賣無錢即買繫籬傍又云江上被花惱不徹無處告訴只顛狂走覓南鄰愛酒伴經旬出飲獨空牀又云夜來醉歸衝虎過昏黑家中已眠卧傍見北斗向江低仰看明星當空大庭前把燭噴兩炬峽口獠猿聞一箇白頭老罷舞復歌杖藜不寐誰能那是也楊誠齋多效此體亦自痛快可喜

浸假

禪家有觀白骨法謂靜坐澄慮存想自身血肉腐壞唯存白骨與吾相離自一尺以至尋丈要見形神元不相屬則自然超脫矣余觀莊子：輿有疾子祀往問之曲儂發背願隱於齊肩高於頂句贅指天陰陽之氣有冷其心間而無事跣躡而鑑于井曰嗟乎夫造物者將以子為此拘：也子祀曰汝惡之乎曰亾子何惡浸假而化予之左臂以為雞子因此求時夜浸假而化予之右臂以為彈子因以求鴉炙浸假而化予之尻以為輪以神為馬予因而乘之豈更駕哉浸漸也假借也蓋積漸假借化此身為異物則神與形離超然無所往而不可矣又何疾又何病於拘：哉視白骨之法蓋本於此佛

法出於老莊於此尤信

伊尹墓

伊尹墓在空桑北一里相傳墓傍生棘皆直如矢范石湖使北過之有詩云三尺黃壚直棘邊此心終古享皇天汲書猥述流傳妄剖擊嗟無咎單篇蓋汲冢書妄載伊尹謀篡爲太甲所殺也事見杜元凱左氏傳後叙

樂天對酒詩

古詩多矣夫子獨取三百篇存勸戒也吾輩所作詩亦須有勸戒之意庶幾不爲徒作彼有繪畫琯刻無益勸戒者固爲枉費精力矣乃若吟賞物華流連光景過於求適幾於誨淫教偷則又不可之甚者矣白樂天對酒

詩曰蝸牛角上爭何事石火光中寄此身隨富隨貧且
懽喜不開口笑是癡人又曰百歲無多時壯健一春能
幾日晴明相逢且莫推辭醉聽唱陽關第四聲又曰昨
日低眉問疾來今朝收淚吊人回眼前見例君看取且
遣琵琶送一杯自詩家言之可謂流麗曠達詞旨俱美
矣然讀之者將必起其類隋廢放之意而汲於此快
樂惜流光則人之職分與夫古之所謂三不朽者將何
時而可爲哉且如唐風蟋蟀之詩蓋勸晉僖公以自虞
樂也然纔曰今我不樂日月其除即曰無已太康職思
其居呂成公釋之曰凡人之情解其拘者或失於縱廣
其儉者或流於奢故疾未已而新疾復生者多矣信矣

唐風之憂深思遠也樂天之見豈及是乎本朝士大夫
多慕樂天東坡尤甚近時葉石林謂樂天與楊虞卿為
姻家而不累於虞卿與元稹牛僧孺相厚善而不黨於
元稹僧孺為裴晉公之所愛重而不因晉公以進李文
饒素不相樂而不為文饒所深害推其所由惟不汲上
於進而志在於退是以能安於去就愛憎之際每裕然
而有餘也此論固已得之然樂天非是不愛富貴者特
畏禍之心甚於愛富貴耳其詩中於官職聲名事極其
形容殊不能掩其眷戀之意其平生所喜者元稹劉禹
錫輩亦皆逐上聲利之徒至一聞李文饒之敗便作詩
暢快之豈非此心未忘猶有偏黨乎慕樂天者愛而知

其疵可也

拙句

作詩必以巧進以拙成故作字惟拙筆最難作詩惟拙
句最難至於拙則渾然天全工巧不足言矣古人拙句
曾經拈出如池塘生春草楓落吳江冷澄江淨如練空
梁落燕泥清暉能娛人遊子澹忘歸大江流日夜客心
悲未央明月入高樓流光正徘徊採菊東籬下悠然見
南山如此等類固已多矣以杜陵言之如兩邊山木合
終日子規啼野人時獨往雲水曉相參喜無多屋宇幸
不礙雲山在家長早起憂國頭年豐若無青嶂月愁殺
白頭人百年渾得醉一月不梳頭一徑野花落孤村春

水生此五言之拙者也春水船如天上坐老年花似霧
中看遷轉五州防禦使起居八座太夫人竹葉於人既
無分菊花從此不須開莫思身外無窮事且盡生前有
限杯雷聲忽送千峯雨花氣渾如百和香秋水纔添四
五尺野航恰受兩三人酒債尋常行處有人生七古
來稀此七言之拙者也他難殫舉可以類推杜陵云用
拙存吾道夫拙之所在道之所存也詩文獨外是乎

容齋奉使

宋紹興辛巳亮既授首葛王篡位使來修好洪景盧往
報之入境與其接伴約用敵國禮伴許諾故沿路表章
皆用在京舊式未幾乃盡却回使依近例易之景盧不

可於是荷驛門絕供饋使人不得食者一日又令館伴
者來言頃嘗從忠宣公學陽吐情實令勿固執恐無好
事須通一線路乃佳景盧等懼留不得已易表章授之
供饋乃如禮景盧素有風疾頭常微掉時人爲之語曰
一日之饑禁不得蘇武當時十九秩傳語天朝洪奉使
好掉頭時不掉頭

九爲究

數窮於九者究也至十則又爲一矣此蔡西山之說

靜坐

伊川每見學者能靜坐便嘆其善學余謂靜坐亦未可
盡信固有外若靜而中未免膠擾者正所謂坐馳也嘗聞

南嶽昔有住山僧每夜必秉燭造檀林衆僧打坐者數
百人或拈竹篋痛箠之或袖中出餅果置其前蓋有以
窺其中之靜不靜而爲是懲勸也彼異端也尚能洞察
其徒心術之隱微而提撕警策之吾儒職教者有愧矣

落梅詩

近時胡仲方落梅詩云自孤花底三更月却怨樓頭一
笛風亦有思致自古才德之士方其少也不使得以展
布及其飄零衰老乃拳歎息之亦已晚矣燭之武曰
臣之少也尚不如人今老矣無能爲也亦寓此意唐人
詩云朝廷欲論封禪事須及相如未病時杜陵病耨詩
意亦如此陳后山挽司馬公曰政雖隨日化身已要人

扶益可悲矣

受禪文

孝宗受禪赦文云凡今者發政施仁之日皆得之間安
視膳之餘天下誦之洪景嚴筆也

文繁簡有當

洪容齋曰文貴於達而已繁與簡各有當也禮記檀弓
石駘仲卒有庶子六人卜所以爲後者曰沐浴佩玉則
兆五人者皆沐浴佩玉石祁子曰孰有執親之喪而沐
浴佩玉者乎不沐浴佩玉石祁子兆衛人以龜爲有知
也蓋連用四沐浴佩玉字使今之爲文者必曰沐浴佩
玉則兆五人者如之石祁子獨不可曰孰有執親之喪

而若此者乎似亦足以當其事省其詞然古意衰矣又云史記衛青傳校尉李朔校尉趙不虞校尉公孫戎奴各三從大將軍以千三百戶封朔為涉軼侯以千三百戶封不虞為隨成侯以千三百戶封戎奴為從平侯至班固作漢書乃省其詞曰校尉李朔趙不虞公孫戎奴各三從大將軍封朔為涉軼侯不虞為隨成侯戎奴為從平侯比史記五十八字中省二十三字然終不若史記樸贍可喜余謂詩亦有如此者古採蓮曲云魚戲荷葉東魚戲荷葉西杜子美杜鵑行西川有杜鵑東川無杜鵑涪南無杜鵑雲安有杜鵑若以省文之法論之但可裁減然只如此說亦樸贍有古意

古人無忌諱

謚者死後易名者也而左傳衛侯賜北宮喜謚曰貞子賜析朱鉏謚曰成子蓋生前預賜之也曾不以為不祥今人不達畏死畏禍百種忌諱古人皆不然只看檀弓季武子成寢杜氏之葬在西階之下許之合葬又許之哭伯高死於衛孔子以為由賜也見我遂哭諸賜氏命子貢為之主來者拜之子夏喪明曾子曰朋友喪明則哭遂往哭子夏亦哭曾子與客立於門側其徒趨而出曰吾父死將出哭於巷曾子曰反哭於爾次因北面而吊焉季武子寢疾嬖固不說齊衰而入見曰士唯公門說齊衰武子曰善哉蓋未始如今人之多忌諱也

奉使見留

蘇武在匈奴十九年魏于什門在燕二十一年近時洪忠宣在金亦幾二十年

玉牒

玉牒脩書始於大中祥符至於政宣而極備考定世次枝分派別而歸於本統者為仙源積慶圖推其所自出至於子孫而列其名位者為宗藩慶系錄具其官爵功罪生死及若男若女者為類紀同姓之親而序其五服之戚疏者為屬籍編年以紀帝系而載其曆數及朝廷政令之因革者為玉牒

心思

書曰思曰睿、作聖揚子曰神心惚恍經緯萬方孔叢子曰心之精神是謂聖管子曰思之思之又重思之思之而不通鬼神將通之非鬼神之力也精誠之極也邵子曰天向一中分造化人從心上起經綸或曰易言何思何慮何也曰始於思終於無思非不思也不待思也此不識不知而順帝則從心所欲而不踰矩庖丁之解牛輪扁之斲輪痾僕之承蜩豈更待於思乎

謝肉牒

周益公家藏歐陽公家書一幅紙斜封乃謝壽光牒其詞云具位某猪肉一斤右伏蒙頒賜領外無任感激謹具牒謝年月日具位某牒蓋改牒為狀自元豐始日趨

鶴林玉露卷之三
於諛矣且前輩交際其饋止於如此未嘗過於豐侈也

鶴林玉露卷之三

鶴林玉露卷之四

廬陵羅大經 景綸

蔡攸辭酒

蔡攸嘗賜飲禁中徽宗頻以巨觥宣勸之攸懇辭不任
杯酌將至顛踣上曰就令灌死亦不至失一司馬光也
由是言之則上之尊光而薄攸至矣然光已死不免削
奪而攸迄被眷寵是可歎也

酒有和勁

唐子西在惠州名酒之和者曰養生主勁者曰齊物論
楊誠齋退休名酒之和者曰金盤露勁者曰椒花雨嘗
曰余愛椒花雨甚於金盤露意蓋有為也余嘗謂與其

一於和勁孰若和勁兩忘頃在太學時同舍以思堂春
合潤州北府兵厨以履遠堂合嚴州瀟洒泉飲之甚佳
余曰不剛不柔可以觀德矣非猛可以觀政矣厥後官
于容南太守王元遂以白酒之和者紅酒之勁者手自
劑量合而為一殺以白灰一刀圭風味頓奇索余作詩
余為長句云小槽真珠太森嚴兵厨玉友專甘醇兩家
風味欠商畧偏剛偏柔俱可憐使君袖有轉物手鷓鴣
杓中平等分更憑石髓媒杓之混融併作一家春李良
不用笑伯高張竦何必譏陳遵時中便是尼父聖孤竹
柳下成一入平雖有智難獨任勃也未可嫌少文黃龍
丙魏要兼用姚宋相濟成開元試將此酒反觀我胸中

問學當日新更將此酒達觀國宇宙皆可歸經綸書生
觸處便饒舌以一貫萬如斲輪使君聞此却絕倒罰以
太白眠金尊

物產不常

書曰若作和羹爾惟鹽梅詩曰標有梅其實七兮又曰
終南何有、條有梅毛氏曰梅柟也陸璣曰佶杏而實
酸蓋但取其實與材而已未嘗及其花也至六朝時乃
略有詠之者及唐而吟詠滋多至宋朝則詩與歌詞連
篇累牘推為群芳之首至恨離騷集衆香艸而不應遺
梅余觀三百五篇如桃李芍藥棠棣蘭之類無不歌詠
如梅之清香玉色迥出桃李之上豈獨取其材與實而

遺其花哉或者古之梅花其色香之奇未必如後世亦未可知也蓋天地之氣騰降變易不常其所而物亦隨之故或昔有而今無或昔無而今有或昔庸凡而今瑰異或昔瑰異而今庸凡要皆難以一定之耳如古人之祭炳蕭酌鬱鬯取其香也而今之蕭與鬱金何嘗有香蓋離騷已指蕭艾爲惡草矣又如牡丹自唐以前未有聞至武后時樵夫採山乃得之國色天香高掩群花於是舒元輿爲之賦李太白爲之詩固已奇矣至宋朝紫黃丹白標目尤盛至於近時則翻騰百種愈出愈奇又如荔支明皇時所謂一騎紅塵妃子笑者謂瀘戎產也故杜子美有憶向瀘戎摘荔支之句是時閩品絕未有

聞至今則閩品奇妙香味皆可僕視瀘戎蔡君謨作譜爲品已多而自後奇名異品又有出於君謨所譜之外者他如木犀山礬素馨茉莉其香之清婉皆不出蘭芷下而自唐以前墨客槧人曾未有一語及之者何也游成之曰一氣埏埴孰測端倪焉知古所無者今不新出而昔常見者後不變滅哉人生須臾即以耳目之常者拘議造物亦已陋矣余聞秦中不產竹昔年山崩其下乃皆鉅竹頤由是言之古固產竹矣晉葛洪欲問丹砂求爲勾漏令勾漏縣隸容州余嘗爲法曹親至其地求所謂丹砂者顆粒不可得豈非昔有而今無哉蓋非特物然也巴邛閩嶠夙號荒陋而漢唐以來漸產人才至

宋朝益盛古稱山西出將山東出相文曰汝穎多奇士
燕趙多佳人其說拘矣

中興講和

宋紹興辛巳金主亮南侵高宗下詔親征其詞云惟天
惟祖宗既共昌於基運有民有社稷敢自逸於燕安又
云歲星臨於吳分定成漑水之勲闔士倍於晉師可決
韓原之勝洪容齋筆也車駕次平江亮授首遂班師次
年壬午丙禪孝宗即位銳意規恢起張魏公督師南軒
以內機入奏引見德壽宮時盧仲賢使金高宗問曾見
仲賢否對曰臣以見之又問卿父謂如何莫便議和否
對曰臣嘗謂金人必衰敗國家必隆興上曰何如對曰

太上皇帝仁孝之德上格于天又傳位聖子雖古唐虞
無以過而金人不道篡奪相仍無復君臣父子不知天
心祐國家乎祐金人乎臣有以知其然也上曰極是今
日金人誠衰乎對曰自亮送死之後士馬物故其衆諸
國背叛人心怨離金誠衰矣上曰自亮死非特金人衰
弱吾國亦未免力弱但仲賢等既回何以應之對曰臣
父職在邊隅戰守是謹此事著廟堂如何議但願審處
而徐應之無貽後悔上曰只是說與卿父今日國家須
更量度民力國力早收拾取聞契丹與金相攻若契丹
事成他日自可收平莊子刺虎之功若金未有亂且務
恤民治軍待時而動可也高宗懲於變故意不欲戰且

聞金人議欲尊我為元故頗喜之孝宗幼年規恢之志甚銳而卒不得逞者非特當時謀臣猛將凋喪累盡財屈兵弱未可展布亦以德壽聖志主於安靜不忍違也厥後蓄積稍羨又嘗有意用兵祭酒芮國器奏曰陛下只是被數文腥錢使作何不試打弄了得幾番犒賞上曰朕未知計也待打弄報卿後打弄只了得十三番犒賞於是用兵之意又寢乃知南北分合自有定數雖英明之主不能強也

志士死飢寒

元次山避水于高原餓糧不繼遂餓而死陳后山為館職當侍祠郊丘非重裘不能禦寒后山止有其一其內

子與趙挺之：內親姊妹也乃為趙假一裘以衣之后山問所從來內以實告后山曰汝豈不知我不著他衣裳即却去之止衣一裘竟感寒疾而死嗚呼二子可謂志士不忘在溝壑者矣充二子之才識德望曳絲乘車食養賢之鼎其誰曰不宜然志節清高寧甘於餓死凍死而不肯少枉其道少失其身此所以嗚呼乎不可尚也陸龜蒙杞菊賦曰我豈不知屠沽兒有酒食耶亦略有二子風味楊子雲曰古者高饑顯下祿隱楊誠齋曰李杜饑寒能幾日却教富貴不論年

儒門罪人

文中子曰通也受夫子罔極之恩孟子曰不失其身而

能事其親者吾聞之矣失其身而能事其親者吾未之聞也由是言之今儒者大半是吾夫子之罪人

氣之先見

歲將饑小民餐必倍俗諺謂之作荒此天地之氣先見也宋開禧兵興之先江西果木秋冬生花有山礬而生梔子花桃樹而生李實此天地之氣先亂也馮此山爲余言之

山靜日長

唐子西詩云山靜似太古日長如小年余家深山之中每春夏之交蒼蘚盈階落花滿徑門無剝啄松影參差禽聲上下午睡初足旋汲山泉拾松枝煮茗啜之隨

意讀周易國風左氏傳離騷太史公書及陶杜詩韓蘇文數篇從容步山徑撫松竹與麝犢共偃息於長林豐草間坐弄流泉漱齒濯足旣歸竹窓下則山妻稚子作筍蕨供麥飯欣然一飽弄筆牕間隨大小作數十字展所藏法帖筆蹟盡卷縱觀之興到則吟小詩或艸玉露一兩段再烹茗一杯出步溪邊解后園翁溪友問桑麻說秔稻量晴校雨探節數時相與劇談一飽歸而倚杖柴門之下則夕陽在山紫綵萬狀變幻頃刻恍可人目牛背笛聲兩三末端而月印前溪矣味子西此句可謂妙絕然此句妙矣識其妙者蓋少彼牽黃臂蒼馳獵於聲利之場者但見袞袞馬頭塵匆匆駒隙影耳烏知

此句之妙哉人能真如此妙則東坡所謂無事此靜坐
一日是兩日若活七十年便是百四十所得不已多乎

日本國僧

余少年時於鍾陵解后日本國一僧名安覺自言離其
國已十年欲盡記一部藏經乃歸念誦甚苦不舍晝夜
每有遺忘則叩頭佛前祈佛陰相是時已記藏經一半
矣夷狄之人異教之徒其立志堅苦不退轉至於如此
朱文公云今世學者讀書尋行數墨備禮應數六經語
孟不曾全記得三五板如此而望有成亦已難矣其視
此僧殆有愧色

杜陵論孔明

史言蜀諸賢凋喪孔明身當軍國之務罰二十以上皆
親之以勞瘁致斃此真兒童之論也夫孔明不死則漢
業可復禮樂可興孔明死則爲五胡亂華爲六朝幅裂
其所關係甚大中管隕星之變天意蓋可知矣豈因罰
二十以上皆親之而致斃乎且孔明死時纔四十四初
非耄老不任勞苦之時况以孔明之明遠豈不能量事
之小大身之勞逸而顧獎精神於瑣瑣以自殞其軀乎
此決無之理也杜少陵知之故曰伯仲之間見伊呂指
麾若定失蕭曹運移漢祚難恢復志決身殲軍務勞言
孔明之死乃漢運已移漢祚已終大數不可支持耳志
決身殲豈因軍務之勞乎蓋不然史臣之說也

龍洲劉改之詩云退一步行安樂法道三箇好喜歡緣
真西山喜誦之或曰退一步行可也至於道三箇好乃
隨俗徇情耳何足言乎余曰古人直道而行理之所在
驀直行將去仕止久速莫不皆然烏有所謂退一步者
自後世貪榮競進爭一階半級至於殺人於是始以退
一步行為安樂法矣古人是則曰是非則曰非明白正
直曾何回護自後世惡直好佞以直言賈禍者比皆
是於是始以道三箇好為喜歡緣矣此處衰世之法也
蓋萬事稱好不特司馬德操為然而吾夫子固有危行
言孫之說矣好盡言以翹人之過此國武子所以見殺
也可不戒哉

淳熙盛事

宋孝宗御宇高宗在德壽光宗在青宮寧宗在平陽邸
四世本支之盛亘古未有楊誠齋時為宮僚賀光宗誕
辰詩云祖堯父舜真千載禹子湯孫更一家讀者服其
精切又云天意分明昌火德誕辰三世總丁年蓋高宗
生於丁亥孝宗生於丁未光宗生於丁卯也丁年字出
李陵書借用亦佳

張子房

張子房蓋俠士之知義策士之知幾者要非儒也故早
年頗侶荆軻晚歲頗似魯仲連得老氏不敢為天下先

宋人心精切為首

此其大者

之術不代大匠斲故不傷手善於打乖荆公詩云漢業存亡俯仰中留侯於此每從容固陵始議韓彭地復道方謀雍齒封蓋因機乘時與之幹旋未嘗自我發端故消弭事變全不費力朱文公云子房只是占便宜不肯自犯手做如為韓報秦攬撥高祖入關及項羽殺韓王成又使高祖平項羽兩次報仇皆不自做後來定太子事他亦自處閒地又只教四老人出來做後來誅戮功臣時更討他不著邵康節之學亦與子房相似康節本是要出來有為之人又不肯深犯手做凡事直待可做處方試為之纔覺難便抽身退如擊壤集中以道觀道等語是物各付物之意蓋自家都不犯手又凡事只到

半中央便止如看花切勿看離披是也

誠齋夫人

楊誠齋夫人羅氏年七十餘每寒月黎明即起詣厨躬作粥一釜遍享奴婢然後使之服役其子東山先生啓曰天寒何自苦如此夫人曰奴婢亦人子也清晨寒冷須使其腹中略有火氣乃堪服役耳東山曰夫人老且賤事何倒行而逆施乎夫人怒曰我自樂此不知寒也汝為此言必不能如吾矣東山守吳夫人嘗於郡圃種苧躬紡緝以為衣時年蓋八十餘矣東山月俸分以奉母夫人忽小疾既愈出所積券曰此長物也自吾積此意不樂果致疾今宜悉以謝醫則吾無事矣平居首飾

止於銀衣止於綉絹生四子三女悉自乳曰飢人之子以哺吾子是誠何心哉誠齋父子視金玉如糞土誠齋將漕江東有俸給僅萬緡留庫中棄之而歸東山帥五羊以俸錢七千緡代下戶輸租其家采椽土階如田舍翁三世無增飾東山病且死無衣裳適廣西帥趙季仁餽纈絹數端東山曰此賢者之賜也衾材無憂矣史良叔守廬陵官滿來訪入其門升其堂目之所見無非可敬可仰可師可法者所得多矣因命畫工圖之而去誠齋東山清介絕俗固皆得之天資而婦道母儀所助亦已多矣左傳文伯之母老而猶績文伯曰以歎之家而主猶績乎其母嘆曰魯其亾乎使僮子備官而未之聞也居吾語汝民勞則思之則善心生逸則淫之則惡心生沃土之民不才淫也瘠土之民莫不向義勞也是故王后親織玄統公侯之夫人加以紘紕卿之內子爲大帶命婦成祭服烈士之妻加以朝服自庶士以下皆衣其夫社而賦事蒸而獻功男女效績愆則有辟古之制也吾真而朝夕修曰必無廢先人爾今日胡不自安以是承君之官予懼穆伯之絕嗣也因是觀誠齋夫人乃知古今未嘗無烈女未嘗無賢母

籠東

楚公子微服過宋門者難之其僕操箠而罵曰隸也不力門者出之晉王竅之敗沙門曇永匿其幼子華使提

衣囊自隨津邏疑之永訶曰奴子不速行捶之數十由是得免宇文泰與侯景戰河上馬逸墜地李穆見之以策扶泰之背曰籠東軍士汝曹主何在而尚留此追者不疑其爲貴人與之馬與俱還三事相類若郭子儀殺羊而裴諝劾之李愬進馬而溫造彈之亦此意也

范石湖使北

宋淳熙中范至能使北孝宗令口奏金主謂河南乃宋朝陵寢所在願受侵地至能奏曰茲事須與宰相商量臣乞以聖意諭之議定乃行上首肯既而宰相力以爲未可而聖意堅不回至能遂自爲一書述聖語至虜庭納之袖中既跪進國書伏地不起時金主乃葛王也性

寬慈傳宣問使人何故不起至能徐出袖中書奏曰臣來時大宋皇帝别有聖旨難載國書令臣口奏臣今謹以書述乞賜聖覽書既上殿上觀者皆失色至能猶伏地再傳宣曰書詞已見使人可就館至能再拜而退虜中群臣或不平議羈留使人而虜主不可至能將回又奏曰口奏之事乞與國書中明報仍先宣示庶使臣不墮欺罔之罪虜主許之報書云口奏之說殊駭觀聽事須審處邦乃乎休既還上甚嘉其不辱命由是超擢以至大用至能在燕京會同館守吏微言有羈留之議乃賦詩曰萬里孤臣致命秋此身何止一浮漚提攜漢節同生死休問羝羊解乳不

常調官

范文正公云常調官好做家常飯好喫余謂人能甘於喫家常飯然後甘於做常調官

官省錢

五代史漢王章爲三司使征利剥下緡錢出入元以八十爲伯章每出錢伯必減其三至今七十七爲官省錢者自章始然今官府於七十七之中又除頭子錢五文有奇則愈削於章矣

民兵

唐初蕭銑據荆襄敗於李靖諸郡皆降而所召援兵至者又十萬人李煜據江南其亡也亦有援兵十數萬宋

朝靖康之禍勤王之帥至者絕少縱有之率皆望風奔潰不敢向賊發一矢蓋五代以前兵寓於農素習戰陣一呼即集宋朝兵費最多兵力最弱皆緣官自養兵紹熙中張魏公在川陝奏以王庶帥興元制置利夔二路軍士於興洋金蓬開達諸州令縣選強壯兩丁取一五丁取二戶與免物力錢二百五十人爲一隊長以知縣爲軍正尉爲軍副月閱於縣春秋閱於郡不半月有兵二十萬乾道初宿亳之役禁旅多出征江上之備空虛陳福公首獻民兵之策及登庸亟欲推行會罷相遂格然兩淮已用其法而荆襄尤有成規開禧用兵禁旅多敗而兩淮山水寨萬弩手率有功特爲官軍所

嫉無以慰其心盡其力耳丙寅虜大舉南牧圍安襄以感荆鄂宣司檄召諸處兵與湖北義勇俱往救諸郡兵不待見敵而潰所過鈔畧甚於戎寇獨義勇隨其帥進退不敢有秋毫犯蓋顧其室家門戶故也張宣公帥荊州與朱文公書云郭杲嘗獻緩急保江之策某折之曰劉信叔劉共父皆嘗有此論真謬計也縱賊入肝脾裏何以爲國上付公以此門當盡力報國要軍要糧此間當應副事苟不濟守臣仗節而死耳郭聞之悚然某之所恃者有義勇二萬六千人也

文鑑

孝宗命呂成公詮擇國朝文章成公盡繙三館之儲踰年成編賜名文鑑周益公承制撰序云建隆雍熙之間其文偉咸平景德之際其文博天聖明道之詞古熙寧元祐之詞達雖體制互興源流間出而氣全理正其歸則同成公爲此書朱文公張宣公殊不以爲然謂伯恭先意思承當此事便好截下因以發明人主之學昔溫公作資治通鑑可謂有補治道識者尚惜其枉費一生精力况文鑑乎

辛幼安詞

辛幼安晚春詞云更能消幾番風雨匆匆春又歸去惜花長恨花開早何況亂紅無數春且住見說道天涯芳草迷歸路怨春不語算只有殷勤畫簷蛛網盡日惹飛

絮長門事准擬佳期又誤娥眉曾有人妬千金縱買相
如賦脉：此情誰訴君莫舞君不見玉環飛燕皆塵土
閒愁最苦休去倚危闌斜陽正在煙柳斷腸處詞意殊
怨斜陽煙柳之句其與未須愁日暮天際乍輕陰者異
矣使在漢唐時寧不賈種豆種桃之禍哉愚聞壽皇見
此詞頗不悅然終不加罪可謂盛德也已其題江西造
口詞云鬱孤臺下清江水中間多少行人淚西北是長
安可憐無數山青山遮不住畢竟東流去江晚正愁予
山深聞鷓鴣蓋南渡之初虜人追隆祐太后御舟至造
口不及而還幼安自此起興聞鷓鴣之句謂恢復之事
行不得也又寄丘宗卿詞云千古江山無覓孫仲謀處

舞榭歌臺風流總被雨打風吹去斜陽艸樹尋常巷陌
人道寄奴曾住想當年鐵馬氣吞萬里如虎元家子草
草封狼居胥贏得倉皇北顧四十三年望中燈火猶記
揚州路可堪回首佛狸祠下一片神鴉社鼓憑誰問廉
頗老矣尚能飯不此詞集中不載太雋壯可喜朱文公
云辛幼安陳同甫若朝廷賞罰明此等人皆可用



鶴林玉露卷之五



廬陵羅

景綸

讀書

自文籍既生學者固不可不讀書子路有何必讀書之說夫子斥之至於學詩學易學禮與夫志在春秋行在孝經之說拳為其子及門人言之晚而歸魯刪定繫作其功至賢於堯舜則後之欲學聖人者舍書則何以哉然是時詞章之名未立科舉之法未行士之讀書者上則取之以撫世酬物又次則取之以博識多聞下至蘇秦之刺股讀書專為揣摩遊說之計固已陋矣然言詩書為有用之具豈未有入耳出口如後世之甚者也

鶴林玉露卷之五

十四

蓋于今之士非堯舜文王周孔不談非語孟中庸大學
不觀言必稱周程張朱學必曰致知格物此自三代而
後所未有也可謂盛矣然豪傑之士不出禮義之俗不
成士風日陋於一日人才歲衰於一歲而學校之所講
逢掖之所談幾有若屠兒之禮佛倡家之讀禮者是可
歎也昔子貢問子石子不學詩乎子石子曰吾暇乎哉
父母求吾孝兄弟求吾弟朋友求吾信吾暇乎哉子貢
曰請投吾詩以學於子公明宣學於曾子三年不讀書
曾子曰宣子居參之門三年不學何也對曰安敢不學
宣見夫子居親庭叱咤之聲未嘗至於大馬宣說之學
而未能宣自夫子之應賓客恭儉而不懈惰宣說之學

而未能宣自夫子之居朝廷嚴臨下而不毀傷宣說之
學而未能宣安敢不學而居夫子之門乎若子石子公
明宣之說今之學者誠不可以不知也

為呂臣

楚為呂臣奉已而不在民於是晉文無復憂已嗚呼自
三代衰民不見先王之治日入於亂皆上下之間懷此
一念有以致之豈獨一為呂臣哉此無他古學不講不
識一箇仁字而已宋朝大臣最是范文正公司馬溫公
見得此箇字分明

蘇黃遷謫

蘇子瞻謫儋州以儋與瞻字相近也子由謫雷州以雷

字下有田字也黃魯直謫宜州以宜字類直字也此章子厚駭謔之意當時有術士曰儋字從立人子瞻其尚能北歸乎雷字兩在田上承天之澤也子由其未艾乎宜字乃直字有蓋棺之義也魯直其不返乎後子瞻北歸至毘陵而卒子由退老于頴十餘年乃終魯直竟卒於宜

張林語

山東義士張林告淮閩曰土地歸本朝銅錢將安往此說儘是余欲添二句云人心歸本朝土地將安往

阿附

光禹之罪浮於王氏六臣之罪浮於朱溫人之皆王陵

則呂氏不敢動矣人皆王章則王氏不敢動矣

猶犬

東坡云養猶以捕鼠不可以無鼠而養不捕之猶蓄犬以防姦不可以無姦而蓄不吠之犬余謂不捕猶可也不捕鼠而捕雞則甚矣不吠猶可也不吠盜而吠主則甚矣疾視正人必欲盡擊去之非捕雞乎委心權要使天子孤立非吠主乎

南中巖洞

桂林石山恠偉東南所無韓退之謂山如碧玉簪柳子厚謂按地峭起林立四野黃魯直謂平地蒼玉忽增峩近時劉叔治云環城五里皆奇石疑是虛無海上山皆

極其形容然此特言石山耳至於暗洞之瑰恠尤不可具道相傳與九疑相通范石湖嘗游焉燭盡而反余嘗隨桂林伯趙季仁遊其間列炬數百隨以鼓吹市人從之者以千計已而入申而出入自曾公巖出于棲霞洞入若深夜出乃白晝恍如隔宿異世季仁索余賦詩紀之其畧曰瑰竒恣搜討貝關青瑤房方隘疑永巷戎敞如華堂玉橋巧橫溪瓊戶正當牕仙佛肖彷彿鍾鼓鏗擊撞顛：左顧龜信：欲吠虎丹龜儼亡恙芝田藹生香搏噬千怪聚絢爛五色光更無一塵滓但覺六月涼玲瓏穿數路曲曲通三湘神鬼剗刻乾坤真混茫入如深夜暗出乃曠日光隔世疑恍惚異境難揣量然終

不能盡形容也又嘗遊容州勾漏洞天四面石山圍繞中平野數里洞在平地不煩登陟外略敞豁中一暗溪穿入因同此流令結小桴秉燭坐其上命篙師撐入詰屈而行水清無底兩岸石如虎豹獠獮森然欲搏行一里許仰見一大星炯然細視乃石穿一孔透天光若星也溪不可窮乃返洞對面高崖上夏間望見荷葉田：然峻絕不可到土人云或見荷花則歲必大熟

傅公謀詞

宜春傅公謀詞云艸：三間屋愛竹旋添栽碧紗牕戶眼前都是翠雲堆一月山翁高卧踏雪水村清冷木落遠山開唯有平安竹留得伴寒梅家童開門看有誰來

客來一笑清話者茗更傳杯有酒只愁無客有客又愁
無酒、熟且徘徊明日人間事天自有安排此詞清甚
末句尤達可歌也許及之爲分宜宰公謀作賀雨詩云
獅子關前半篆煙二龍飛下卓篙泉銀河掣電連宵雨
綠野翻雲四月天便覺春生花一縣會看秋熟米三錢
何時卓魯登黃閣都與寰區作有年及之擊節公謀尤
工作酸文嘗作無遮榜語云紅旗渡口淒涼芳艸夕陽
天白紙山頭慘淡落花寒食節甚工

冬狩行

自古夷狄交侵中國衰微必人主真有哀痛之誠將帥
真有憤切之志然後可以言恢復杜陵冬狩行曰草間

狐兇盡何益天子不在咸陽宮規警將帥也又曰朝廷
雖無幽王禍得不哀痛塵再蒙規警人主也然人主者
本也人主果有興衰撥亂之志其誰敢不從故又曰烏
乎得不哀痛塵再蒙所以深規警人主也

舉事輕捷

大凡舉事輕捷則易成繁重則難濟春秋時宋人殺楚
使者楚子聞之投袂而起履及於室皇劍及於寢門之
外車及於蒲胥之市何其輕捷也澶淵之役寇準與真
宗論親征上欲入準曰陛下不可入、則不出矣於是
高瓊在殿下大呼道遙子即擁以行亦何其捷疾舉事
須知此乃能壓難成功此却非倉卒所致須平時有備

有謀規模定號令明然後臨事之時上下如能相應蓋亦不出易簡二字而已東坡云千鈞之牛制於三尺之童子弭耳而下之曾不如狙猿之奮擲於山林大抵易簡則輕捷繁難則重滯

周文陸詩

朱文公於當世之文獨取周益公於當世之詩獨取陸放翁蓋二公詩文氣質渾厚故也

范雲

人之狂惑失其本心有大可笑者南史范雲初爲陳武帝屬官武帝九錫之命在旦夕雲忽感寒疾恐不獲預慶事召徐文伯診視以實懇之曰可便得逾乎文伯曰

登便差甚易政恐二年後不復起耳雲曰朝聞道夕死猶可况二年乎文伯乃以火燒地布桃葉設席置雲其上頃刻汗解裏以溫松翌日有瘳雲喜甚文伯曰不足喜也越二年果卒夫老子曰身與名孰親况於榮貴外物有道之士蓋視爲塵垢糝糠籍曰所見未超未能忘情則亦必有此身乃可有此榮貴也今雲欲預九錫之慶乃甘心促壽愈疾以從之所謂皮之不存毛將安傅豈不愚惑之甚哉且其言曰朝聞道夕死可矣夫輔人以其篡奪而分其富貴是果何道哉末世之士不知世間香臭至於如此亦可哀矣東坡云劉聰聞爲須渡國王則不復畏死人之愛富貴有甚於生者月犯少微吳中

高士求死不得人之好名有甘於一死者固皆可笑矣
然未若范雲可笑之甚也

置青櫃

杜成已爲相以爲宰相日見賓客疲神妨務無益於事
乃不復見客但設青櫃於府門有欲言利害者投之越
旬日并櫃撤去有題一聯于府門者曰杜光範之門人
將望而去矣撤暗投之櫃我且卷而懷之夫題門者則
已薄矣而成已此舉亦未之思也

慈湖詩

楊慈湖詩云山禽說我育中事煙柳藏他物外機又云
萬里蒼茫融妙意三杯虛白浴天真又六言云淨几橫

琴曉寒梅花落在絃間我欲清吟無句轉煩門外青山
句意清圓足現其所養

楊存中逐吏

殿帥楊存中有所親愛吏平居賜予無笑一旦無故怒
而逐之吏莫知得罪之由泣拜辭去存中曰無事莫來
見我吏悟其意歸以厚貲俾其子入臺中爲吏居無何
御史欲論存中乾沒軍中糞錢十餘萬其子聞知告其
父其父奔告存中存中即具劄奏言軍中有糞錢若干
椿管某處惟朝廷所用不數日果以爲言高宗出存中
劄子示之御史坐妄言被黜而存中之眷日隆存中之
逐吏亦兵法之餘智也然御史可謂不密矣

淵明詠雪

淵明雪詩云傾耳無希聲在目皓已結只十字而雪之輕虛潔白盡在是矣後來者莫能加也

不忘山林

士豈能長守山林長親蓑笠但居市朝軒冕時要使山林兼笠之念不忘乃為勝耳陶淵明赴鎮軍參軍詩曰望雲慙高鳥臨水愧游魚真想初在襟誰謂形迹拘似此宵襟豈為外榮所點染哉荆公拜相之日題詩壁間曰霜松雪竹鍾山寺投老歸歟寄此生只為他見趣高故合則留不合則拂袖便去更無拘絆山谷云佩玉而心若槁木立朝而意在東山亦此意也

不知心

許由不受堯之天下逃諸逆旅逆旅人疑其竊皮冠伯夷叔齊適周之使叔旦往見之曰加富二等就官一列血牲而盟之二子相視而笑此雖寓言然人識見相遠奚啻九牛毛其不知心者亦往之類此

陸氏義門

陸象山家于撫州金谿累世義居一人最長者為家長一家之事聽命焉逐年選差子弟分任家事或主田疇或主租稅或主出納或主厨爨或主賓客公堂之田僅足給一歲之食家人計口打飯自辦蔬肉不合食私房婢僕各自供給許以米附炊每清曉附炊之米交至掌

厨爨者置曆交收飯熟按曆給散賓至則掌賓者先見之然後白家長出見款以五酌但隨堂飯食夜則卮酒杯羹雖久留不厭每晨興家長率衆子弟致恭于祖禰祠堂聚揖于聽婦女道萬福于堂暮安置亦如之子弟有過家長會衆子弟責而訓之不改則撻之終不改度不可容則告于官屏之遠方晨揖擊鼓三疊子弟一人唱云聽々勞我以生天理定若還懶惰必飢寒莫到飢寒方怨命虛空自有神明聽又唱云聽々衣食生身天付定酒肉貪多折人壽經營太甚違天命定々

誠齋謁紫巖

楊誠齋爲零陵丞以弟子禮謁張魏公時公以遷謫故

社門謝客南軒爲之介紹數月乃得見因跪請教公曰元符貴人腰金紆紫者何限惟鄒至完陳瑩中姓名與日月爭光誠齋得此語終身厲清直之操晚年退休悵然曰吾平生志在批鱗請劍以忠鯁南遷幸遇時平主聖老矣不獲遂所願矣立朝時論諫撻々如乞用張浚配享言朱熹不當與唐仲友同罷論儲君監國皆天下大事孝宗嘗曰楊萬里直不中律孝宗亦曰楊萬里有性氣故其自贊云禹曰也有性氣舜云直不中律自有二聖玉音不用千秋史筆

前輩勤學

胡澹庵見楊龜山龜山舉兩肘示之曰吾此肘不離案

三十年然後於道有進張無垢謫橫浦寓城西寶界寺其寢室有短牕每日昧爽輒抱書立窓下就明而讀如是者十四年洎此歸窓下石上雙趺之跡隱然至今猶存前輩爲學勤苦如此然邇山蓋少年事無垢乃晚年尤難也

仕宦歸故鄉

歐陽公居永豐縣之沙溪其考崇公葬焉所謂瀧岡阡是也厥後奉母鄭夫人之喪歸合葬載青州石鐫阡表石綠色高丈餘光可鑑阡近沙山太守廟襄事禱于廟祝板猶存曰大事有日陰雲屢興假以三日之晴則拜神之賜其敢忘報執政得立功德寺公素排佛教雅不

欲立寺崇公諱觀又不可立觀乃立青陽宮然公自葬鄭夫人之後不復歸故鄉其作吉州學記云幸餘他日因得歸祭故鄉將見吉之士皆道德明秀而可爲公卿問於其俗而婚喪飲食皆中禮節入於其里而長幼相孝慈觀於其家行於其郊而少者扶其羸老壯者代其負荷於道路然後樂學之道成而得時從先生耆老席于衆賓之後聽鄉樂之歌飲獻酬之酒而以詩頌天子太平之功周覽學舍思詠李侯之遺愛不亦美哉雖有此言而迄不踐樂類昌山水作思類詩退休竟不焉前輩議其無回首敝廬息間喬木之意近時周益公歸休尹直卿以詩賀之云六一先生薄吉州歸田去作類昌

游我公不向螺江住蓋殺青原白鷺洲

鐵柱杖

壽皇在宮中常携一漆柱杖宦官宮妾莫得睨視嘗游後苑偶忘携焉特命小黄門取之二人竭力曳以來蓋精鐵也上方有意中原故陰自習勞苦如此

蘇黃遺文

東坡贊文與可梅竹石云梅寒而秀竹瘦而壽石醜而文是為三益之友席子擇遭喪山谷憐其貧糾合同志者助之其辭云富貴不仁理難共語仁者不富孰能獨成百足之蟲至死不僵以扶之者衆也願與諸君同力賑之二帖余皆見其真跡坡谷集所不載

大承氣湯

周益公參大政朱文公與劉子澄書云如今是大氣證渠却下四君子湯雖不為害恐無益於病爾嗚呼以乾淳之盛文公猶恨當國者不用大承氣湯况下於乾淳者乎然歷考往聖如孔子相魯而下大承氣湯固是對證大舜繼堯亦不免下大承氣湯信矣文公之為名言也益公初在後省龍大淵曾覲除閣門格其制不下奉祠而去十年不用天下高之後入直翰林覲以使事還除節鉞人謂公必不州制而公竟州之其詞云八統馭民敬故在尊賢之上宜其不敢用大承氣湯也

曾隱公攝

歐陽子曰隱公非攝也使隱果攝則春秋不稱公春秋稱公則隱公非攝無疑也此論未然春秋雖不書隱公居攝而於書仲子之事自隱然可見夫母以子貴世俗之情也使桓不將立則仲子特一生公子之妾耳周王何爲其歸其賵魯國何爲而考其宮今也歸賵而不嫌瀆亂之譏考官而加嚴事之禮徒以桓之將爲君也桓將爲君則隱之攝著矣或曰隱攝則何以稱公秉坡曰周公攝而克復子者也故不稱王隱公攝而不克復子者也故稱公史有謚國有廟春秋獨得不稱公乎此論亦未然周公之攝也誥命之際曰周公曰王若曰曷嘗自稱王乎竊意魯史舊文必著隱公攝位之實去攝而

書公乃仲尼之特筆一以著隱之不當遜一以著桓之不當立二者皆罪也歐公論隱公趙盾許止事皆未明春秋之旨春秋之所以爲春秋者正當微顯闡幽若但直書其事則夫人能矣何爲游夏不能措一辭哉

子弟爲幹官

朱文公與慶國卓夫人書云聞尊意欲爲五哥經營幹官差遣某切以爲不可人家子弟多因此壞却心性蓋其生長富貴本不知艱難一旦仕宦便爲此官遂司只有使長一人可相拘轄又多寬厚長者不欲以法度見繩上無職事了辦之責下無吏民繫繫之憂而州縣守令勢反出已下可以陵轢故後生子弟爲此官者無不

傲慢縱恣觸事情然愚意以為可且為營一稍在人下
職事與人打罵差遣乃所以成就之若必欲與求官幹
乃是置之有過之地誤其終身前輩愛人以德至於如此
卓夫人乃少傅劉公子羽之妃樞密共父之母五哥即平
甫朱與劉蓋姻婭初文公之父韋齋疾革手自為書以
家事屬少傅韋齋歿文公年十四少傅為築室於其里
俾奉母居焉少傅手書與白水劉致中云於緋溪得屋
五間器用完備又於七倉前得地可以樹有圃可蔬有
池可魚朱家人口不多可以居文公視卓夫人猶母云

箕子

五代史漢王章不喜文士常語人曰此輩與一把箕子未

知真倒何益於國箕子本俗語歐公據其言書之殊有
古意温公通鑑改作授之握美不知縱橫不如歐史矣

農圃漁樵

農圃家風漁樵樂事唐人絕句模寫精矣余摘十首題
壁間每菜羹豆飯後啜茗茗一杯偃卧松窓竹榻間令
兒童吟誦數過自謂勝如吹竹彈絲今記於此韓偓云
聞說經旬不啓關藥窓誰伴醉開顏夜來雪壓前村竹
剩看溪南幾尺山又云萬里清江萬里天一村桑柘一
村煙漁翁醉着無人喚過午醒來雪滿船長孫佐輔云
獨訪山家歇還涉茅屋斜連隔松葉主人聞語未開門
繞籬野菜飛黃蝶薛能云邵平瓜地接吾廬穀雨乾時

偶自鋤昨夜春風欺不在就牀吹落讀殘書韋莊云南
陵酒熟愛相招醺甲傾來綠滿瓢一醉不知三日事任
他童稚作漁樵杜荀鶴云山雨溪風捲釣絲瓦甌蓬底
獨斟時醉來睡着無人喚流下前灘也不知陸龜蒙云
雨後沙虛古岸崩漁梁携入亂雲層歸時月落汀洲暗
認得山妻結網燈鄭谷云白頭波上白頭翁家逐船移
浦之風一尺鱸魚新釣得兒孫吹火荻花中李商隱云
城郭休過識者稀哀猿啼處有柴扉滄江白石漁家路
薄暮歸來雨濕衣張演云鷺湖山下稻梁肥豚柵雞柵
對掩扉桑柘影斜春社散家之扶得醉人歸

柳詩

唐人柳詩云水邊楊柳綠煙絲立馬煩君折一枝惟有春
風最相惜殷勤更向手中吹朱文公每喜誦之取其興也

進青魚

宋文帝時司徒義康顯總朝權四方饋遺皆以上品薦
義康而以次品供御上嘗冬月啖柑嘆其形味並劣義
康曰今年柑殊有佳者遣人還京府取柑大供御者三
寸上寢不能平義康旋以罪廢唐代宗謂李泌曰路嗣
恭獻瑠璃盤九寸乃以徑尺者遺元載湏其至議之賴
泌一言嗣恭免罪而元載竟誅呂許公不肯多進淮白
魚蓋懲此也秦檜之夫人常入禁中顯仁太后言近日
子魚大者絕少夫人對曰妾家有之當以百尾進歸告

檜：咎其失言與其館客謀進青魚百尾顯仁拊掌笑
曰我道這漣子村果然蓋青魚似子魚而非特差大爾
觀此賊檜之姦可見

鶴林玉露卷之五

鶴林玉露卷之六

廬陵羅大經 景綸

花卿歌

杜陵花卿歌末云人道花卿絕世無既稱絕世無天子
何不喚取守京都此詩全篇形容其勇銳有餘而忠義
不足故雖可以守京都而天子終不敢信用之語意涵
蓄不迫切使人咀嚼而自得之可以亞國風矣或曰末
句乃恨天子不用之詞非也

杜陳詩

范二員外吳十侍御訪杜少陵於艸堂少陵偶出不及
見謝以詩云暫往北隣去空聞二妙歸幽棲誠闊略哀

白已光輝野外貧家遠村中好客稀論文或不愧重肯
歛柴桑陳后山在京師張文潛晁無咎為館職聯騎過
之后山偶出蕭寺二君題壁而去后山亦謝以詩云白
社雙林去高軒二妙來排門衝鳥雀揮壁帶塵埃不憚
升堂費深愁載酒回功名付公等歸路在蓬萊杜陳一
時之事相類二詩醞藉風流未易優劣

騎牛詩

姚鑄為吉州判官以平寇論功不數年擢守章貢為人
豪雋喜作詩自號雪蓬嘗令畫工肖其像騎牛於澗谷
之間索郡人趙東野題詩東野題云騎牛無笠又無蓑
斷隴橫岡到處過暖日暄風不常有前村雨暗却如何
蓋規切之也居無何忤帥臣以貪劾之時端平更化之
初施行特重貶衡陽人皆服東野之先見

得窮鬼力

齊景公有馬千駟死之日民無得而稱焉伯夷叔齊餓
死首陽之下民到于今稱之揚子雲作法言蜀之富人
載錢五十萬求書名其間子雲不可李仲元鄭子真不
持錢子雲書之至今與日月爭光余觀韓退之送窮文
歷述窮鬼之害至末乃云吾立子名百世不磨是到底
却得窮鬼力夷齊李鄭亦所謂得窮鬼力者也

方寸地

俗語云但存方寸地留與子孫耕指心而言也三字雖不

見於經傳却亦甚雅余嘗作方寸地說其辭云或問方寸地何地也亦有治地之法否乎余曰偉哉問世之人固有無立錐地者亦有跨都兼邑者有無貧富相絕也惟此方寸地人之有之歛之其細無倫充之包八荒徭萬物無界限無方體甚矣其地之靈也然此地人之有而治地之力不人之能施治地之法不入之能知故蕪穢不治者有此地而不能治之而不知其法者雖治此地亦猶不治是故孔子孟軻治地之農師圃師也六經語孟治地之齊民要術也良知良能惻隱羞惡辭讓是非之端嘉種之誕降者也博文約禮仰觀俯察求輔仁切憇之功資直諒多聞之益培糞灌溉法也時之習日之新暗室屋漏守之密視聽

言動察之精封植長養法也忿必懲欲必窒惰必警輕必矯無稽之言必不聽便佞之友必不親芟雜耘鋤法也優遊而厭飢之固守而靜俟之不躡等不陵節不求聞不計獲乃宋人之不振苗郭橐駝之善種樹也誠如是則信善而大化篤實而輝光通神明贊化育乃實穎實粟之時參天溜雨之日也治地至此斯可言善治地矣道家有寸田尺宅之說養生引年者取之里諺有留方寸地與子孫耕之說種德食報者取之其言未為無理要皆墮於一偏若從孔孟治地之法則仁者必壽善者必福清明之志氣如神厚德之流光浸遠道家里諺之說在其中矣雖然是地也嘉種固所素有惡種亦易以生

嘉種每難於封殖惡種常至於蔓延其或認楨棘爲美
櫟認稊稗爲良苗則天之沃之惡種日見其猥大而嘉
種微矣嗚呼噫嘻可懼也哉然則如之何曰在早辨

山居上梁文

孫仲益山居上梁文云老蟾駕月上千崖紫翠之間一
鳥呼風嘯萬木丹青之表又云衣百結之衲捫虱自如
拄九節之筇送鴻而去奇語也

除目損道心

古詩云一日看除目二年損道心余謂人患道心不存耳
道心果存豈看除目所能損哉彼慕膾鯁餌之念洗滌
未淨往身寄山林而心存朝市跡履泉石而意繫軒

冕視山林泉石反苦籠檻桎梏宜其看除目而心爲之
損也特所損者人心耳豈道心哉伊川曰百官萬務金
革百萬之衆曲肱飲水樂在其矣中萬變皆在人其實
無一事朱文公云良其背是止於止行其庭是止於動
不獲其身是無與於已不見其人是亦不見人無人無
已但見是此道理各止其所也止而至於如此其誰能
動之昔有僧居深山中鬼百計害之或誘以淫聲美
色或眩以珍羞玩好或懼以奇形異物或脇以刀鋸炮
烙僧皆不爲之動久之乃寂然無有或問其故僧曰山
鬼之伎倆有盡老僧之不聞不見無盡此即所謂不獲
其聲不見其人者也心安如是又豈除目所能損也

士脩於家

全州士人滕處厚貽書魏鶴山云漢人謂士脩於家而壞於天子之庭夫能壞於天子之庭者必其未嘗脩於於家者也可謂至論然余觀柳子厚河間傳非不脩於家也及竊視持已者甚美左右為不善者已更得適意鼻息哂然則雖欲不壞於天子之庭得乎要之不壞於天子之庭乃特立獨行者也若夫中人雖脩於家其不壞於天子之庭者鮮矣

用兵吉兆

馬燧討李懷光夜宿一村問田父此何村也曰名埋懷村燧大喜曰吾誅懷老必矣澶淵之沒亦以宋捷為吉

北岳飛討楊么時么據洞庭出沒不可測偶獲一謀者問其巢穴對曰險阻安可入惟飛乃能入耳飛大笑曰天遣汝為此言吾必破其巢穴三軍大喜迄平之蓋用兵行師但得吉兆亦足以壯三軍之氣重耳出奔乞食于野人野人與之塊此本相戲而子犯乃曰天賜也却說從吉兆上去蓋以堅從亡者之心如狐鳴魚書之類至詐為吉兆以動眾若老嫗赤帝之稱世礪雲氣之瑞昭灼如此安得使豪傑之不景從乎

尤揚雅諳

尤梁溪延之博洽工文與楊誠齋為金石交淳熙中誠齋為秘書監悉之為太常卿又同為青宮寮案無日不

相從二公皆善謔延之嘗曰有一經句請秘監對曰楊
氏爲我誠齋應曰尤物移人衆皆歎其敏確誠齋戲呼
延之爲蝟蟬延之戲呼誠齋爲羊一日食羊白腸延之
曰秘監錦心繡腸亦爲人所食呼誠齋笑吟曰有腸可
食何須恨猶勝無腸可食人蓋蝟蟬無腸也一坐大笑
厥後閒居書問徃來延之則曰羔兒無恙誠齋則曰彭
越安在誠齋寄詩云文戈却日玉無價寶氣蝟蟬金欲
流亦以蝟蟬戲之也延之先卒誠齋祭文云齊歌楚此
萬象爲挫瓌偉詭譎我倡公和放浪諧謔尚友方朔巧
發捷出公嘲我酥

韓平原

宋寧宗既受禪韓平原所望不過節鉞知閣劉弼嘗從容
告趙忠定曰此事從胃不能無功亦須分些官職與他忠
定不答由是漸有邪謀迄逐衆君子余友趙從道有詩云
慶元宰相事紛、說着令人暗斷魂好聽當時劉弼語分
此官職乞平原余亦作一篇云齋壇一鉞底須慳坐見諸
賢散似煙不使慶元爲慶曆也由人事也由天

詩不拘韻

揚誠齋云今之禮部韻乃是限制士子程文不許出韻
因難以見其工耳至於吟詠情性當以國風離騷爲法
又奚禮部韻之拘哉魏鶴山亦云除科舉之外間賦之
詩不必一、以韻爲較况今所較者特禮部韻耳此只

是魏晉以來之韻隋唐以來之法若據古音則今麻馬等韻元無之歌字韻與之字韻通豪字韻與蕭字韻通言之及此方是經雅

莽大夫

司馬溫公王荊公曾南豐最推尊楊雄以為不在孟軻下至朱文公作通鑑綱目乃始正其附王莽之罪書莽大夫楊雄死莽之行如狗彘三尺童子知惡之雄肯附之乎劇秦美新不過言孫以免禍耳然既受其爵祿則是甘為之臣僕矣獨得辭莽大夫之名乎文公此筆與春秋爭光麟當再出也劉潛夫詩云執戟浮沈計未踈無端著論美新都區、所得能多少枉被人書莽大夫

余謂名義所在豈當計所得之多少若以所得之少枉被惡名為恨則三公之位萬鍾之祿所得倘多可以甘受惡名而為之乎此詩頗礙義理余不可以不辨

李杜

李太白當王室多難海宇橫潰之日作為歌詩不過豪俠使氣狂醉於花月之間耳杜稷蒼生曾不繫其心膂其視杜少陵之憂國憂民豈可同年語哉唐人每以李杜並稱韓退之識見高邁亦惟曰李杜文章在光燄萬丈長無所優劣也至宋朝諸公始知推尊少陵東坡云古今詩人多矣而惟人杜子美為首豈非以其飢寒流落而一飯未嘗忘君也歟又曰北征詩識君臣大體忠

義之氣與秋色爭高可貴也朱文公云李白見永王璘
反便從史之詩人沒頭腦至於如此杜子美以稷契自
許未知做得與否然子美却高其救房瑄亦正

交情世態

漢翟公爲廷尉既罷門可設雀羅乃書門曰一貴一賤交
情乃見唐李適之罷相作詩曰避賢初罷相樂聖且銜
杯爲問門前客今朝幾箇來蓋炎而附寒而棄從古然
矣灌夫不負竇嬰於擯棄之時任安不負衛青於衰落
之日徐晦越鄉而別臨賀后山出境而見東坡宜其足
以響千載之齒頰也劉元城之事司馬公當其在朝書
問削迹及其間居亟問無虛月此又高矣至於巢谷年

逾七十徒步萬里訪二蘇於瘴海之上死而不悔節士也

了翁孫女

陳了翁日與家人會食男女各爲一席食已必舉一話
頭令家人答一日問曰並坐不橫肱何也其孫女方七
歲答曰恐妨同坐者

聽讒詩

世傳聽讒詩云讒言謹莫聽之禍殃結君聽臣當誅
父聽子當央夫妻聽之離兄弟聽之別朋友聽之疎骨
肉聽之絕堂八尺軀莫聽三寸舌一上有龍泉殺人
不見血不知何人作詞意明切類白樂天

畫馬

唐明皇令韓幹觀御府所藏馬幹曰不必觀也陛下痲馬萬疋皆臣之師李伯時工畫馬曹輔爲太僕卿太僕廨舍國馬皆在焉伯時每過之必終日縱觀至不暇與客語大槩畫馬者必先有全馬在胸中若能積精儲神賞其神俊久；則胸中有全馬矣信意落筆自超妙所謂用意不分乃凝於神者也山谷詩云李侯畫骨亦畫肉筆下馬生如破竹生字下得最妙蓋胸中有全馬故由筆端而生初非想像模畫也東坡文與可竹記云竹之始生一寸之萌耳而節葉具焉自蜩腹蛇跗以至于劍拔十尋者生而有之也今畫者節；而爲之葉；而累之豈復有竹乎故畫竹先得成竹於胸中執筆熟視乃見其所欲畫者急起從之振筆直遂以追其所見如兔起鶻落少縱則逝矣坡公善於畫竹者也故其論精確如此曾雲巢無疑工畫艸蟲年邁愈精余嘗問其有所傳乎無疑笑曰是豈有法可傳哉某自少時取艸蟲籠而觀之窮晝夜不厭又恐其神之不完也復就艸地之間觀之於是始得其天方其落筆之際不知我之爲艸蟲耶艸蟲之爲我也此與造化生物之機緘蓋無以異豈有可傳之法哉

風水

古人建都邑立室家未有不擇地者如書所謂達觀于新邑管卜漚澗之東西詩所謂升虛望楚降觀于桑度

其隰原觀其流泉蓋自三代時已然矣余行天下凡通
都會府山水固皆翕聚至於百家之邑十室之市亦必
倚山帶溪氣象回合若風氣虧疏山水飛走則必無人
煙起聚此誠不可不信不可不擇也乃若葬者藏也藏
者欲人之不得見也古人之所謂卜其宅兆者乃孝子
慈孫之心謹重親之遺體使其他日不為城邑道路溝
渠耳借昌精擇亦不過欲其山水回合艸木茂盛使親
之遺體得安耳豈藉此以求子孫富貴乎郭璞謂本骸
乘氣遺體受蔭此說殊未通夫銅山西崩靈鍾東應木
走於山栗牙於室此乃活氣相感也今枯骨朽腐不知
痛痒積日累月化為朽壤蕩游塵矣豈能與生者相

感以致禍福乎此決無之理也世之人惑璞之說有貪
求吉地未能愜意至十數年不葬其親者有既葬以為
不吉一掘未已至掘三掘四者有因買地致訟棺未入
土而家已蕭條者有兄弟數人惑於各房風水之說至
於骨肉化為仇讎者凡此數禍皆璞之書為之也且人
之生也貧富貴賤夭壽賢愚稟性賦分各自有定謂之
天命不可改也豈冢中枯骨所能轉移乎若如璞之說
上帝之命反制於一杯之土矣揚誠齋素不信風水之
說嘗言郭璞精於風水宜妙選吉地以福其身以利其
子孫然璞身不免於刑戮而子孫卒以衰微則是其說
已不驗於其身矣而後世方且誦其遺書而尊信之不

亦惑乎今之術者言墳墓若有席帽山子孫必爲侍從
官蓋以侍從重戴故也然唐時席帽乃舉子所戴故有
席帽何時得離身之句至宋朝都大梁地勢平曠每風
起則塵沙撲面故侍從跨馬許重戴以障塵夫自有宇
宙則有此山何賤於唐而貴於今耶近時京丞相仲遠
豫章人也崛起寒微祖父皆火化無墳墓每寒食則野
祭而已是豈因風水而貴哉

南軒辨梅溪語

南軒以內機入奏引至東華門孝宗因論人才問王十
朋如何對曰天下莫不以爲正人上曰當時出去有少
說話待與卿說十朋尙來與史浩書稱古則伊周今則

閣下是何說話對曰十朋豈非謂浩當伊周之任而責
之乎上曰更有一二事見其有未純處對曰十朋天下
公論歸之更望陛下照察主張臣父以爲陛下左右豈
可無剛明腹心之臣庶幾不至孤立上曰剛患不中柰
何對曰人貴夫剛、貴夫中剛或不中猶勝於柔懦上
默然蓋史直翁與張魏公議論不同梅溪則是張而非
史者也故上因直翁之說而有是言上又嘗曰難得伏
節死義之臣南軒對曰陛下欲得伏節死義之臣當於
犯顏敢諫中求之亦指梅溪而言也

道不遠人

子曰道不遠人孟子曰道在邇而求諸遠有尼悟道詩

云盡日尋春不見春
芒屨踏遍隴頭雲
歸來笑撚梅花
嗅春在枝頭已十分
亦脫灑可喜

郎當曲

魏鶴山天寶遺事詩云紅錦綉盛河北賊紫金盞酌壽
王妃美成晚歲郎當曲正是三郎快活時俗所謂快活
三郎者即明皇也小說載明皇自蜀還京以駝馬載珍
玩自隨明皇聞駝馬所帶鈴聲謂黃幡綽曰鈴聲頗以
人言語幡綽對曰佞言三郎當三郎當明皇愧且笑

劉錡贈官制

逆亮窺江劉錡已病亦同扞禦未幾亮殲錡亦殂特贈
太尉周益公行詞云岑彭殞而公孫亡諸葛死而仲達

走雖成功有命皆莫究於生前而遺烈在人可徐觀於
身後讀者服其的切益公常舉似謂楊伯子曰起頭兩
句須要下四字議論承貼四六特拘對耳其立意措詞
貴渾融有味與散文同

廬州之變

宋紹興中劉光世在淮西軍無紀律張魏公為都督奏
罷之命叅謀呂祉往廬州節制光世頗得軍心祉儒者
不知變繩束頓嚴諸軍忿怨統制鄺瓊率眾縛祉渡淮
歸劉豫魏公方宴僚佐報忽至滿座失色公色不變徐
曰此有說第恐虜覺耳因樂飲至夜分乃為蠟書遣死
士持遺瓊言事可成之不可速全軍以歸虜得書疑瓊

分隸其衆困苦之邊賴以安南軒言符離之役諸軍皆潰
唯存帳下千人其終夕彷徨而先公方熟寢鼻息如雷

無極太極

游誠之南軒高第常言易有太極而周子加以無極何
也試即吾心驗之方其寂然無思萬善未發是無極也
雖云未發而此心昭然靈源不昧是太極也聞者服其
簡明其詩亦可愛如春風未肯催桃李留得暎籬淺淡
香平生意思春風裡信手題詩不用工閒處漫游當世
事靜中方識古人心皆有味

薛客

齊封田嬰於薛號靖郭君專齊之權常欲城薛客謂曰
君不聞海大魚乎網不能上鉤不能牽蕩而失水則螻
蟻制焉今齊亦君之水也君長有齊奚以薛爲苟爲失
齊雖隆薛之城至於天庸足恃乎乃不果城董卓積金
帛於郿塢曰事成雄據天下事不成守此塢足矣人之
智愚相遠乃如此

能言鸚鵡

上蔡先生云透得名利關方是小歇處今之士大夫何
足道真能言之鸚鵡也朱文公曰今時秀才教他說廉
直是會說廉教他說義直是會說義及到做來只是不
廉不義此即能言鸚鵡也夫下以言語爲學上以言語
爲治世之所以日降也而或者見能言之鸚鵡乃指爲

鳳凰鸞鷲惟恐其不在靈囿間不亦異乎

賀雪表

黃伯庸代宰相賀雪表云招來衆彥無晝卧洛陽之人
激勵三軍有夜入蔡州之志詞意壯切真宰相事也李
公甫表云漢使臨疆未必得匈奴之要領楚軍挾纊惟
當堅祈父之爪牙語雖巧頗牽彊

漢宮詩

唐李商隱漢宮詩云青雀西飛竟未回君王猶在集靈
臺侍臣最有相如渴不賜金莖露一杯譏武帝求仙也
言青雀杳然不回神仙無可致之理必矣而君王未悟
猶徘徊臺上度幾見之且胡不以一物驗其真妄乎金

盤盛露和以玉屑服之可以長生此方士之說也今侍
臣相如正苦消渴何不以一杯賜之若服之而愈則方
士之說猶可信也不然則其妄明矣二十八字之間委
蛇曲折含不盡之意

繪事

繪雪者不能繪其清繪月者不能繪其明繪花者不能
繪其馨繪泉者不能繪其聲繪人者不能繪其情然則
言語文字固不足以盡道也

心脉

敖器之善察脉常言心脉要細繁洪備此三者大貴大
賢也趙季仁舉侶謂余曰此非論脉乃是論學余曰小

心翼細也務時敏察也有容乃大洪也季仁曰正是如此

吾翁若翁

漢高祖謂項羽曰吾翁即若翁此語理意甚長左氏傳
齊敗于鞏晉人欲以蕭同叔子為質齊人曰蕭同叔子
者非他寡君之母也若以匹敵則亦晉君之母也孟子
曰殺人之父者人亦殺其父然則非自殺之一間耳高
祖之語與此暗合史稱不修文學而性特達此類是也
項羽迄不殺太公有感於斯言矣乃知鷙猛之人宵中
未常無天理特在於有以發之耳

鶴林玉露卷之六

鶴林玉露卷之七

廬陵羅大經 景綸

高宗配享

高廟配享洪容齋在翰苑以呂頤浩趙鼎韓世忠張俊
四人為請蓋文武各用兩人出於孝宗聖意也遂令侍
從議時宇文子英等十一人以為宜如明詔而識者多
謂呂元直不厭人望張魏公不應獨遺楊誠齋時為秘
書少監以書爭之以欺專私三罪斥容齋且言魏公有
社稷大功五建復辟之勲一也發儲嗣之議二也誅范
瓊以正朝綱三也用吳玠以保全蜀四也却劉麟以定
江左五也於是有旨再令詳議越數日上忽諭大臣曰

呂頤浩等配享正合公論更不須議洪邁固是輕率揚
萬里亦未免浮薄於是二人皆求去容齋守南徐誠齋
守高安而魏公迄不得配食誠齋詩云出却金宮入梵
宮翠微綠霧染衣濃三年不識西湖月一夜初聞南澗
鍾藏室蓬山真昨戲園翁溪友得今從若非朝士追相
送何處冥鴻更有蹤又云新晴在野花香過雨迢迢
沙路長兩度立朝今結局一生行客老還鄉猶嫌數騎
傳書札賸喜千峯入肺腸到得前頭上船處莫將白髮
照滄浪此去國時詩也可謂無幾微見於顏面矣其家
嗣東山先生伯子跋其論配享書藁云覆羨真得皂囊
書錦水元來勝石渠但寶銀鈎并鐵畫何須玉帶與金

魚蓋苗劉作亂時矯降祐詔朕竄魏公高宗在昇陽宮
方啜羹左右來告驚懼羹覆于手爲之傷暨復辟見
魏公泣數行下舉手云公痕跡猶存左次魏和伯子詩
云鑿坡蓬監兩封書道院東西各付渠乾道聖人無固
必是非付與直哉魚詞意亦佳但當塗乃江東道院容
齋守南徐非當塗也

紫窄衫

渡江以來士大夫始衣紫窄衫上下如一紹興九年詔
公卿長吏毋得以戎服臨民復用冠帶論者以爲擾於
是士大夫皆服涼衫乾道中李獻之上言會聚之際顏
色可憎今陛下上承兩宮宜復紫衫爲便上從之蓋人

情樂簡便久矣昔孝節先生徐仲積事母至孝一日竦
然自省曰吾以欄幙謁貴人而不以見母是敬母不如
敬貴人也不可乃日具欄幙揖母人皆笑之孝節行之
終身近時靜春先生劉子澄朱文公高第也守衡陽日
以冠裳泣事憲使趙民則嘗紫衫來見子澄不脫冠裳
見之民則請免冠裳子澄端笏肅容曰戒石在前小臣
豈敢民則皇恐退具冠裳以見然由是不相樂夫欄幙
揖母冠裳臨民常事也而世俗且難之至於紫窄袖衫
乃戎服也出於兵興一時權宜而相承至今不能改然
則古道何時而可復乎

非孟

李泰伯著常語非孟子後舉茂材論題出經正則庶民
興不知出處曰吾無書不讀此必孟子中語也擲筆
出晁說之亦著論非孟子建炎中宰相進擬除官高宗
曰孟子發揮王道說之何人乃敢非之勒令致仕鄭叔
友著崇正論亦非孟子曰軻忍人也辨士也儀秦之流
也戰國縱橫捭闔之士皆發冢之人而軻能以詩禮者
也余謂孟子以儀秦之齒舌明周孔之肺腸的切痛快
蘇醒萬世此何可非泰伯所以非之者謂其不當勸齊
梁之君以王耳昔武王伐紂舉世不以為非而伯夷叔
齊獨非之東萊呂先生曰武王憂當世之無君者也伯
夷憂萬世之無君者也余亦謂孟子憂當世之無君者

也秦伯憂萬世之無君者也此其特見卓論真可與夷齊同科至於說之叔友捨其遺說而附和之則過矣

匹夫光國

平原孟嘗君養天下客而未嘗得一客張湯公孫弘接天下士而未嘗得一士魯仲連固不肯與雞鳴狗盜者伍也汲長孺固不肯與奴顏婢膝者齒也若得一魯仲連則一客可以敵千客若得一汲長孺則一士可以埒千士故山谷詩曰匹士能光國三孱不滿隅

不交近習

不主癰疽瘡環所以爲孔子不禮臧倉王驩所以爲孟子宋璟不與內侍交語明皇深加歎獎杜宗不從監軍

請選宮女入宮武宗知其有宰相才范純夫爲諫官東鄰宦官陳衍園亭在焉衍每至園中不敢高聲謂其徒曰范諫議一言到上前吾輩不知死所矣此其所以爲范純夫也此其所以爲元祐也王黼爲宰相與宦者梁師成鄰居密開後戶往來徽宗幸黼第徘徊觀覽偶見之大不樂此其所以爲王黼也此其所以爲崇觀政宣也

王定國趙德麟

東坡於世家中得王定國於宗室中得趙德麟獎許不容口定國坐坡累謫賓州瘴烟窟裏五年面如紅玉尤爲坡所敬服然其後乃階梁師成以進而德麟亦諂事譚稹紹興初德麟主管大宗正司有旨令易環衛官宰

相呂頤浩奏曰令時讀書能文蘇軾嘗薦之以不須易
高宗曰令時管事譚稹為清議所薄竟易之士大夫晚
節持身之難如此余觀屈平之騷經曰蘭芷變而不芳
兮荃蕙化而為茅何昔日之芳艸兮今直為此蕭艾也
豈其有他故兮莫好修之害也朱文公釋之曰世亂俗
薄士無常守乃小人害之而以為莫如好修之害者何
哉蓋由君子好修而小人嫉之使不容於當世故中材
以下莫不變化而從俗則是其所以致此者反無有如
好修之為害也嗚呼其崇觀政宣之時乎宜二子之改
節易行也

妬婦喻

張無垢在越上作幕官不請供給錢在館中進書不肯
轉官人皆以為好名之過無垢曰既請月俸又受供給
偶然進書又便受賞於我心實有不安此亦本分事何
名之好貪者往、不曾尋思此心病也心有病人安得
知我知之當自醫別人既不自知病及惡人醫病猶婦
人妬者非特妬其夫又且妬人之夫其惑甚矣無垢此
喻甚切世降俗薄貪濁成風反相與非笑廉者諛佞成
風反相與非笑直者軟熟成風反相與非笑剛與競進
成風反相與非笑恬退者侈靡成風反相與非笑儉約
者傲誕成風反相與非笑謙默者賈子云莫邪為鈍兮
鉛刀為銛東坡云變丹青於三塗兮乃反謂子為非智

風俗至於如此豈不可哀

誅曦詔

安子文與楊巨源李好義合謀誅逆曦矯詔之詞曰惟
干戈省厥躬朕既昧聖賢之戒雖大馬識其主爾乃甘
夷虜之臣邦有常刑罪在不赦詞旨明白乃好義姊夫
楊君玉之詞也曦年十許歲時其父挺嘗問其志曦有
不臣之語其父怒蹴之爐火中灼其面號吳巴子云

古人稱字

魏鶴山云古人稱字者最不輕儀禮子孫於祖禰皆稱
字孔門諸子多稱夫子為仲尼子思孫也孟子又子思
弟子也亦皆稱仲尼雖今人亦稱之而人不為恠游夏

之門人皆字其師漢初唯子房一人得稱字中世有字
其諸父字其諸祖者近世猶有後學呼退之兒童誦君
實之類觀鶴山此說古人蓋以稱字為至重今世唯平
交乃稱字稍尊稍貴者便不敢以字稱之與古異以魯
哀公誅孔子亦曰尼父則君亦可以字臣周益公謂先
君曰壽皇每稱東坡唯曰子瞻而不名其欽重如此

靜重

大凡應大變處大事須是靜定凝重如周公之赤烏九
几是也漢武帝因不移步識霍光因不轉眴識金日磾
亦是窺見他靜定凝重處故逆知其可以託孤寄命韓
魏公之疑立亦此類也歐陽公所謂垂紳正笏不動聲

色而措天下於泰山之安形容得最好然魏公亦只是天資至如司馬公則加以學力尤不可及如更新法傳欽之蘇子瞻勸其防後患公起立拱手仰視厲聲曰天若祚宋必無此事此大小大力量方能為此言張宣公云使其當時應答不過曰苟利社稷遑恤其他只如此說已自好安能如公之言更不論一己利害想其平日所養故臨事發言能如是中理雖聖人不過如此說近於終條理者矣

問寢龍樓

紹熙甲寅光宗以疾不能過宮吾郡尹德鄰初參大學簾引詩題出問寢龍樓曉德鄰詩云父母人皆有儀刑

自冕旒問安趨燕寢拂曉過龍樓鶴駕嚴晨衛雞人徹夜籌慈闈天語接飛棟月華收萬姓齊呼舞三宮款獻酬小儒憂國切幾白九分頭學官擊節一時傳誦

自家他家

象山與羅春伯書云宇宙無際天地開闢本只一家來書乃謂自家屋裏人不亦陋乎謂之自家不知孰為他家古人但問是非邪正不問自家他家君子之心未嘗不欲其去非而就是捨邪而適正其怙終不悛則當為夫之上六矣舜於四凶孔子於少正卯亦治其家人耳象山此論可謂渾厚高明且以我朝言之自慶曆以前未有君子小人之名所謂本只一家者也故君子未嘗

受禍自慶曆以後君子小人之名始立則有自家他家之分矣故君子之受禍一節深於一節

冬至奏對

丁常任昆陵人淳熙間爲郎冬至日上殿奏對王音曰曉來雲物甚奇卿曾見否常任實不曾見即對曰豈惟臣見之四海萬姓皆見之孝宗大喜曰卿對甚偉命除淮漕

詩家喻愁

詩家有以山喻愁者杜少陵云憂端如山來瀕洞不可撥趙嘏云夕陽樓上山重疊未抵春愁一倍多是也有以水喻愁者李頎云請量東海水看取淺深愁李後生云問君都有幾多愁恰似一江春水向東流秦少游云落紅萬點愁如海是也賀方回云試問問愁知幾許一川煙艸滿城風絮梅子黃時雨蓋以三者比愁之多也尤爲新奇兼興中有比意味更長

經總錢

宣和中大盜方臘擾浙中王師討之命陳亨伯以發運使經制東南七路財賦因建議如賣酒鬻糟商稅牙稅與夫頭子錢樓店錢皆少增其數別曆收繫謂之經制錢其後廬宗原頗附益之至翁彥國爲總制使倣其法又收贏焉謂之總制錢靖康之初嘗詔罷之軍興議者再請施行色目寔廣視宣和有加焉以迄于今爲州縣大患初亨伯之作俑也其兄聞之哭於家廟謂剝民產

怨禍必及子孫厥後葉正則作外稿謂必盡去經總錢而後天下乃可為治平乃可望然中興百年非無聖君賢相未聞有議及此者是獨何也

論語

杜少陵詩云小兒學問止論語大兒結束隨尚賈蓋以論語為兒童之書也趙普再相人言普山東人所讀者止論語蓋亦少陵之說也太宗嘗以此論問普普畧不隱對曰臣平生所知誠不出此昔以其半輔太祖定天下今欲以其半輔陛下致太平普之相業固未能無愧於論語而其言則天下之至言也朱文公曰某少時讀論語知愛自後求一書似此者卒無有

本政書

林勳賀州人紹興中登進士第嘗進本政書欲漸復三代井田之法大畧謂五尺為步、百為畝、百為頃、十為井、方一里井十為通、十為成、方十里成十為終、十為同、方百里一同之地提封萬井實為九萬頃三分去二為城郭市井官府道路山林川澤與夫饒曠不毛之地定其可耕與為民居者三千四百井實為三萬六百頃一頃之田二夫耕之夫田五十畝餘夫亦如之總二夫之田則為百畝百畝之收平歲為米五十石上熟之歲為米百石二夫以之養數口之家蓋裕如矣總八頃之稅為米十有六石錢三貫二百文此之

謂什一井復一夫之稅以其人爲農正掌勸督耕耨賦稅之事但收十有五夫之稅總計三千四百井之稅爲米五萬一千石爲錢一萬二千貫以此爲一同之率一頃之居其地百畝十有六夫分之夫宅五畝總十有六夫之宅爲地八十畝餘二十畝以爲社學場圃一井之人共之使之朝夕群居以教其子弟然貧富不等未易均齊奪有餘以補不足則民駭矣今宜立之法使一夫占田五十畝以上者爲良農不足五十畝者爲次農其無田而爲閒民與非工商在官而爲游惰未作者皆驅之使爲隸農良農一夫以五十畝爲正田以其餘爲羨田正田毋敢廢業必躬耕之其有羨田之家則無得買

田唯得賣田至於次農則毋得賣田而與隸農皆得買羨田以足一夫之數而升爲良農凡次農隸農之未能買田者皆使之分耕良農之羨田各如其夫之數而歲入其租於良農如其俗之故非自能買田及業主自收其田皆毋得遷業若良農之不願賣羨田者宜悉俟其子孫之長而分之官毋苛奪以賈其怨少須暇之自合中制矣其書大畧如此朱文公張宣公皆喜其說謂其有志復古然今時欲行經界尚以爲難况均田乎

元子宗子

橫渠西銘曰大君者父母之宗子其說本於召公召誥曰有玉雖小元子哉又曰皇天上帝改厥元子元子即

宗子也武王誓師之辭曰亶聰明作元后元后作民父母余謂父母之說不如元子宗子之說意味深長蓋謂之元子宗子則天父地母臨之於上諸弟之巔連無告者責望於下非特惻然於同胞之愛且有所嚴憚而不敢墮其職分也

六和塔詩

李疆父爲昭文相嘗出六和塔題詩云往來塔下幾經秋每恨無從到上頭今日登臨方覺險不如歸去卧林丘疆父爲相清正謹守規矩自奉如寒士書卷不釋手薨于位謚文清

湖州生祠

嘉定間楊伯子爲湖州守彈壓豪貴牧養小民治聲赫然爲三輔冠郡之士相與肖象祠于學宮與工部尚書戴少望並祠伯子意不悅會除浙東庾節將行辭先聖先師禮畢與校官諸生坐于講堂命取所祠畫象來題詩其上云面有憂民色天知報國心三年風月少兩鬢雪霜深更莫留形迹何曾廢古今不如隨我去相伴老山林遂卷藏而行當時士子有戲和其詩者末句云可憐戴工部獨樹不成林

黃陵廟詩

陸士規布衣工詩秦檜喜之嘗挾秦書于臨州守魏遺不滿意升堂嫚罵守懼以書白秦白解秦怒陸甚陸請

見不出然猶令其子小相者見之問其近作陸誦其黃
陵廟一絕云東風吹艸綠離路入黃陵古廟西帝子
不知春又去亂山無主鷓鴣啼小相入誦之秦吟賞再
四即命請見待之如初

殺人手段

宗杲論禪云譬如人載一車兵器弄了一件又取出一
件來弄便不是殺人手段我則只有寸鐵便可殺人朱
文公亦喜其說蓋自吾儒言之若子貢之多聞美一車
兵器者也曾子之守約寸鐵殺人者也

詩互體

杜少陵詩云風含翠篠娟淨雨裏紅蕖冉冉香上句

風中有雨下句雨中有風謂之互體楊誠齋詩云綠先
風動麥白碎日翻池亦然上句風中有日下句日中有風

陳黃送秦少章

韓文公作歐陽詹哀詞云詹閩人也父母老矣捨朝夕
之養以來京師其心將以有得於是而歸爲父母榮也
雖其父母之心亦然詹在側雖無離憂其志不樂也詹
在京師雖有離憂其志樂也山谷送秦少章從蘇公學
云斑衣兒啼真自樂從師學道也不惡但使新年勝故
年即如常在郎罷前後山云士有從師樂諸兒却未知
欲行天下獨信有俗間疑秋入川原秀風連鼓角悲目
前豚犬類未必慰親思二詩皆用韓意而後山之味永

鶴林玉露卷七
陸象山云男子生而以桑弧蓬矢射天地四方示有四
方之志此其父母教之望之第一義也顏子之家一簞
食一瓢飲在人不堪憂之地而其子乃從其師周遊天
下履宋衛陳蔡之厄而不以為悔此豈俚俗之人拘曲
之士所能知其義哉蓋誠使此心無所放失無所陷溺
全天之所予而無傷焉則千萬世之遠無異於親膝不
然雖日用三牲之養猶為不孝也象山此說尤更精透

住山僧

有僧住山或謀攘之僧乃掛草鞵一雙於方丈前題詩
云方丈前頭掛草鞵流行坎止任安排老僧脚底從來
闊未必枯骸就此埋余謂士大夫去就亦當如此揚誠

齋立朝時計料自京還家之裏費貯以一篋鑰而置之
卧所戒家人不許市一物恐累歸擔日若佻裝者余又
聞昔有京尹忘其名不攜家唯弊篋一擔每晨起則撒
帳卷席食畢則洗鉢收箸以拄棒撐弊篋于廳事之前
常若逆旅人將行者故擊搏豪彊拒絕宦寺悉無所畏
余曩在太學嘗館于一貴人之門一日命市薪六百券
有卒微哂謂其徒曰朝士今日不知明日事乃買柴六
百貫耶余因竊歎士大夫之見有不如是卒者多矣

奏疏貴簡

劉平國云奏疏不必繁多為文但取其明白足以盡事理
感悟人主而已此論極好如伊川說命無逸立政所未論

只如諸葛孔明前後出師表何嘗費詞近時如張宣公自
都機入奏三劄陸象山爲刪定官輪對五劄皆可法

閒居交游

自昔士之閒居野處者必有同道同志之士相與往還
故有以自樂陶淵明移居詩云昔欲居南村非爲卜其
宅聞多素心人樂與數晨夕又云鄰曲時來往抗言談
在昔竒文共欣賞疑義相與析則南村之鄰豈庸之
士哉杜少陵在錦里亦與南鄰朱山人往還其詩云錦
里先生烏角巾園收芋粟未全貧慣看賓客兒童喜得
食階除鳥雀馴秋水纒添四五尺野航恰受兩三人白
沙翠竹江村暮相送柴門月色新又云相近竹參差相

過人不知幽花散滿逕野水細通池歸客村非遠殘草
席更移看君多道氣從此數追隨所謂朱山人者固亦
非常流矣李太白尋魯城北范居士誤落蒼耳中詩云
忽憶范野人閒園養幽姿又云還傾四五酌自詠猛虎
詞近作十日歡遠爲千歲期風流自簸蕩謔浪偏相宜
想范野人者固亦可人之流也

廢心用形

列子曰仲尼廢心而用形淵明詩云形迹憑化往靈府
長獨閒說得更好蓋其自彭澤賦歸之後洒然悟心爲
形役之非故其言如此果能行此則靜亦靜動亦靜雖
過化存神之妙不外是矣謂淵明不知道可乎

大字成犬

宋寶慶初當國者欲攻去真西山魏鶴山朝士莫有任責梁成大獨欣然願當之遂除察院擊搏無遺力當時太學諸生曰大字傍宜添一點曰梁成大余謂犬之信信不過吠非其主耳是有功於主也今不肖之臺諫受權貴之指呼納豪富之賄賂內則剪天子之羽翼外則奪百姓之父母是有害於主也吾意犬亦羞與為伍矣

釋豉

韻書釋豉云配鹽幽叔四字甚工

鶴林玉露卷之七

鶴林玉露卷之八

廬陵羅大經 景綸

紅友

常州宜興縣黃土村東坡南遷北歸嘗與單秀才步田至其地主携酒來餉曰此紅友也坡曰此人知有紅友而不知有黃封可謂快活余嘗因是言而推之金貂紫綬誠不如黃帽青叢朱鞞繡鞍誠不如芒屨藤杖醇醪養牛誠不如白酒黃雞玉戶金鋪誠不如松窓竹屋無他其天者全也

韓平原客

韓平原嘗為南海尉延一士人作館客甚賢而文既別

音問杳不通平原當國常思其人一日忽來上謁蓋已
改名登第數年矣一見歡甚館遇極厚嘗夜闌酒罷平
原屏左右促膝問曰某謬當國秉外間議論如何其人
太息曰平章家族危如累卵矣尚復何言平原愕然問
故對曰是不難知也椒殿之立非出於平章則椒殿怨
矣皇子之立非出於平章則皇子怨矣賢人君子自朱
熹彭龜年趙汝愚而下斥逐貶死不可勝數則士大夫
怨矣邊釁既開三軍暴骨孤兒寡婦之哭聲相聞則三
軍怨矣並邊之民死於殺掠內地之民死於科需則四
海萬姓皆怨矣叢是衆怨平章何以當之平原默然久之
曰何以教我其人辭謝再三故問乃曰僅有一策主

上非心黃屋若急建青宮開陳三聖家法為揖遜之舉
則皇子之怨可變而為恩而椒殿退居德壽雖怨無能
為矣於是輔佐新君渙然與海內更始曩時諸賢死者
贈恤生者召權遣使聘虜釋怨請和以安邊境優犒諸
軍厚恤死士除苛解廼盡去軍興無名之賦使百姓有
更生之意然後選擇名儒遜以相位乞身告老為綠野
之游則易危為安轉禍為福或者其庶幾乎平原猶豫
不能決欲留其人處以掌故其人力辭竟去未幾禍作

誄鷗

杜少陵詩云鷗行炯自如形容甚妙如召南大夫節儉
正直而退食委蛇彼都人士行歸于周而從容有常皆

炯自如者也

老瓦盆

杜少陵詩云莫笑田家老瓦盆自從盛酒長兒孫傾銀
注玉驚人眼共醉終同臥竹根蓋言以瓦盆盛酒與傾
銀壺而注玉盃者同一醉也尚何分別之有由是推之
蹇驢布韉與金鞍駿馬同一遊也松牀篔簹席與繡帷王
枕同一寢也知此則貧富貴賤可以一視矣昔有僕嫵
其妻之陋者主翁聞之召僕至以銀杯瓦枕各一酌酒
飲之問曰酒佳乎對曰佳銀杯者佳乎瓦枕者佳乎對
曰皆佳主翁曰杯有精粗酒無分別汝既知此則無嫌
於汝妻之陋矣僕悟遂安其室少陵詩意正如此而一

本題改玉字作瓦字失之矣

去婦詞

李太白去婦詞云憶昔初嫁君小姑纔倚牀今日妾辭
君小姑如妾長回頭語小姑莫嫁如兄夫古今以爲絕
唱然以余觀之特忿恨決絕之詞耳豈若谷風去婦之
詞曰毋逝我梁毋發我笱雖遭放棄而猶反顧其家戀
戀不忍乎乃知國風優柔忠厚信非後世詩人所能仿
佛也古今賦昭君詞多矣唯白樂天云漢使却迴憑寄
語黃金何日贖蛾眉君王若問妾顏色莫道不如宮裏
時前輩以爲高出衆作之上亦謂其有戀戀不忘君之
意也歐陽公明妃詞自以爲勝太白而實不及樂天至

於荆公云漢恩自淺胡自深人生樂在相知心則悖理
傷道甚矣杜子美儒冠忍餓垂翅青冥殘盃冷炙酸辛
萬狀不得已而去秦然其詩曰尚憐終南山回首清渭
濱戀君之意藹然溢於言外其爲千載詩人之冠冕良
有以也魏鶴山云處人倫之變當以三百五篇爲正考
槃小死之爲臣小弁凱風之爲子燕谷風之爲婦終
風之爲母栢舟之爲宗臣何人斯之爲友皆不遇者也
而責已重以周待人輕以約優柔諄切怨而不怒憂而
不敢疏也東坡在黃在惠在儋不患不偉患其傷於太
豪便欠畏威敬怒之意如茲遊最竒絕所欠唯一死之
類詞氣不甚平又如韓文公廟碑詩云作書詆佛譏君

王要觀南海窺衡湘方作諫書時亦異諫行而跡隱豈
是故爲詆訐要爲南海之行蓋後世詞人多有此意如
去國一身高名千古之類十有八九若此不知君臣義
重家國憂深聖賢去魯去齊不若是愁者非以一去爲
難也此論精矣

楊太真

武惠妃薨明皇悼念不知後宮數千無當意者或言壽
王妃楊氏之美絕世無雙帝見而悅之乃令妃自以其
意乞爲女官號太真更爲壽王娶韋昭訓女潛納太真
宮中寵遇如惠妃冊爲貴妃與衛宣公納伋之妻無以
異白樂天長恨歌云楊家有女初長成養在深閨人未

識天生麗質難自棄一朝選在君王側爲尊者諱也近
時楊誠齋題武惠妃傳云桂折秋風露折蘭千花無朵
可天顏壽王不忍金宮冷獨獻君王一玉環詞雖工意
亦未婉唯李商隱云龍池賜酒敞雲屏羯鼓聲高衆樂
停夜半宴歸宮漏永薛王沉醉壽王醒其詞微而顯得
風人之體

遷謫量移

士大夫危言峻節遷謫凄凉晚歲收用衰落懲創利方
爲圓者多矣呂子約謫廬陵量移高安楊誠齋送行詩
云不愁不上青霄去上了青霄莫愛身蓋祖杜少陵送
嚴鄭公云公若居台輔臨危莫愛身然以之送遷謫向

用之士則意味尤深長也

隱士出山

晁以道與陳叔易俱隱嵩山叔易被召出山以道作詩
云處士何人爲作牙盡攜猿鶴到京華故山巖壑應惆
悵六峯前只一家籍溪胡原仲除正字朱文公寄詩云
先生去上芸香閣老新我豸角冠留取幽人卧空谷一
川風月要人看二詩相似然以道後亦出山時人反以此
詩嘲之文公卷舒以道難進易退高節全名師表百世
乃知終南少室之流與有道士正不可同年語也

批答援引

東坡批答呂大防辭免恩命云卿有夷狄盜賊之虞倉

廬禮樂之歎陰陽風雨之憂此三者誠當今之大計孟子曰責難於君謂之恭夫既以責其君而不以身任之非仁人也蓋援其所自言者以勉之近時真西山批答參政樓鑰乞致仕不允云夫七十致仕雖著于經二三大臣難拘此制卿昔代言嘗以是却臣鄰之請矣豈今日遂忘斯誼乎此又切矣

存問逐答

李泰發忤秦檜貶海上雷州守王彥恭存問周魏甚至檜聞之貶彥恭辰陽陸升之泰發姪壻也告訐泰發家事得刪定官檜死彥恭復官升之貶雷州胡澹菴謫嶺南士大夫多凌蔑之否則畏避之方茲字務德本亦檜黨待之獨

有加禮澹菴深德之檜死其黨皆逐務德入京謀一差遣不可得栖旅館澹菴偶與王梅溪語及其事梅溪曰此君子也率館中諸公訪之且揄揚其美務德由此遂晉用由此觀之君子贏得做君子小人枉了做小人

物畏其天

潁濱釋莊子曰魚不畏網罟而畏鷓鴣畏其天也物之畏其天誠有可恠者余里中一村童嘗見大蛙十數聚于汙池叢棘之下欲前捕之熟視乃一巨蛇蟠棘下以次啖群蛙群蛙凝立待啖不敢動又村叟見蜈蚣逐一蛇行甚急蜈蚣漸近蛇不復動張口以待蜈蚣竟入其腹逾時而出蛇已斃矣村叟棄蛇于深山中踰旬往視

之小蜈蚣無數食其腐肉蓋蜈蚣產卵于蛇腹中也余
又嘗見一蜘蛛逐蜈蚣甚急蜈蚣逃入籬捨竹中蜘蛛
不復入但以足跨竹上搖腹數四而去伺蜈蚣久不出
剖竹視之蜈蚣已節々爛斷如蟹醬矣蓋蜘蛛搖腹之
時乃灑溺以殺之也物之畏其天有如此者夫蛇之恣
啖群蛙自以爲莫已敵矣而不知蜈蚣之能涉其腹也
蜈蚣之斃蛇育子自以爲莫禦矣而不知蜘蛛之能
醢其軀也世之人昂々然以凶毒自多者可以觀矣且
蛙之不能敵蛇固也蜈蚣小於蛇矣而能制蛇蜘蛛小
於蜈蚣矣而能制蜈蚣物豈專以小大爲強弱哉

詩用助語

詩用助語字貴帖妥如杜少陵云古人稱逝矣吾道
終焉又云去矣英雄事荒哉割據心山谷且然聊爾
耳得也自知之韓子蒼云曲檻以南青嶂合高堂其上
白雲深皆渾然帖妥吾郡前輩王才臣云並舍者誰清
可喜各家之竹翠相交曾幼度云不可以風霜後葉何
傷於月雨餘雲亦佳

野服

朱文公晚年以野服見客榜客位云棗陽呂公嘗言京
洛致仕官與人相接皆以閒居野服爲禮而歎外郡之
不能然其旨深矣某已叨誤恩許致其事本未敢遽以
老夫自居而比緣久病艱於動作遂不免遵用舊京故

俗輒以野服從事然上衣下裳大帶方履此之涼衫自
不為簡其所便者但取束帶足以為禮解帶足以燕居
且使窮鄉下邑得以復見祖宗盛時京都舊俗如此之
美也余嘗於趙季仁處見其服上衣下裳衣用黃白青
皆可直領兩帶結之緣以皂如道服長與膝齊裳必用
黃中及兩旁皆四幅不相屬頭帶皆用一色取黃裳之
義也別以白絹為大帶兩旁以青或皂緣之見齊輩則
繫帶見卑者則否謂之野服又謂之便服

而已失官

寶慶初元洪舜俞為考功郎應詔言事詞旨剴切真西
山謂陳止甫曰讀洪考功封事某殊有愧色其封事中

論臺諫失職云月課將臨筆不敢下稱量議論之異同
揣摩情分之厚薄可否未決吞吐不能其相率勇往而
不顧者恭請聖駕欵謁景靈宮而已臺臣摘以為言謂
祇見宗廟此重事也而洪某乃言欵謁景靈宮而已詞
語嫚易有輕宗廟之意遂遭罷黜仍鐫三官舜俞有詩
云不得之乎成一事却因而已失三官

函首詩

庶人之讎釋記禮者謂可盡五世矧有天下者乎齊襄
復九世之讎春秋大之我國家之於金虜蓋百世不共
戴天之讎也開禧之舉韓侂胄無謀浪戰固可罪矣然
乃至函其首以乞和何也當時大學諸生之詩曰晁錯

既誅終叛漢於期已入竟亡燕此但以利害言耳蓋未嘗以名義言也譬如人家子孫其祖父為人所殺其田宅為人所吞有一狂僕佐之復讎謀踈計淺迄不能遂乃歸罪此僕送之讎人使之甘心焉可乎哉

前後後貶

韓昌黎上大尹李實書云愈來京師於今十五年所見公卿大臣不可勝數皆能守官奉職無過失而已未見有赤心事上憂國如閣下者今年以來不雨者百有餘日種不入土野無青艸而盜賊不敢起穀價不敢貴百坊百二十司六軍二十四縣之人皆若閣下親臨其家老姦宿賊銷縮摧沮魂亡魄喪影滅迹絕非閣下條理

真服布宣天子威德其何能及此其後作順宗實錄乃云實諂事李齊運驟遷至京兆尹恃寵強復不顧邦法是時大旱畿甸乏食實一不以介意方務聚斂徵求以給進奉每奏對輒曰今年雖旱而穀甚好由是租稅皆不免陵轢公卿勇於殺害人不聊生及謫通州長史市里謹呼皆袖瓦礫遮道伺之與前書一何反也豈書乃過情之譽而史乃紀實之辭耶然退之古君子單辭片語必欲傳信寧肯妄發而譽之過情乃至於此是不可曉也近時汪彥章投李伯紀啓云孤忠貫日正二儀傾頌側之中凜氣橫秋揮萬騎笑談之頃又云士訟公寃咸舉幡而集闕下帝從民望令免胄以見國人其贊美

至矣及居翰苑草伯紀謫詞乃云朋姦罔上有虞必去
於驩兜欺世盜名孔子先誅於正卯又云專殺尚威傷
列聖好生之德信讒喜佞爲一時群小之宗與前啓又
何反也伯紀真君子而醜詆至此嘻其甚矣當時亦有
以此問彥章者彥章云我前啓自直一翰林學士而彼
不我用安得不醜詆之是可笑也退之於李實豈亦
若是耶然李實真小人與伯紀不同退之失於前之過
譽彥章失於後之過毀譽猶可過也毀不可過也

春風花艸

杜少陵絕句云遲日江山麗春風花艸香泥融飛燕子
沙暖睡鴛鴦或謂此與兒童之屬對何異余曰不然上

上句見兩間莫非生意下二句見萬物莫不適性於此
而涵泳之體認之豈不足以感發吾心之真樂乎大抵
古人好詩在人如何看在人把做甚麼用如水流心不
競雲在意俱遲野色更無山隔斷天光直與水相通樂
意相關禽對語生香不斷樹交花等句只把做景物看
亦可把做道理看其中亦儘有可玩索處大抵看詩要
胸次玲瓏活絡

旌忠莊

韓世忠嘗議買新淦縣官田高宗聞之御札特以賜世
忠其詞云卿遇敵必克且無褻聞卿買新淦田爲子孫
計今舉以賜卿聊旌卿之忠故其旌旌忠蓋當時諸

將各以姓爲軍號如張家軍岳家軍之類朝廷頗疑其跋扈聞其買田蓋以爲喜故特賜之世忠之買田亦未必非蕭何之意也克且無擾四字可謂要言如玉全斌輩非不克柰擾何信能行此四字雖古名將何以加諸

三將

漢惟一趙充國唐惟一王忠嗣本朝惟一曹彬有三代將帥氣象唐人詩云澤國山河入戰圖生民何計樂樵蘇憑君莫話封侯事一將功成萬骨枯讀之可爲酸鼻

彤庭分帛

杜少陵詩云彤庭所分帛本自寒女出鞭撻其夫家聚歛貢城闕聖人筐篚恩實欲邦國活臣如忽至理君豈棄此

物即爾俸爾祿民膏民脂之意也士大夫誦此亦可以悚然懼惻然思矣余嘗見州郡迎新者設飾甚費因成詩云赤子須摩撫紅塵幾送迎幕張雲匝車列鑑鮮明豈是胥民血空教適宦情忍聞分竹者竭澤自求盈

血山

克王假山成請宮僚觀之姚坦熟視曰此血山耳開寶塔成田錫上疏曰衆以爲金碧煥煌臣以爲塗膏鬻血

吾心如秤

諸葛孔明曰吾心如秤不能爲人作輕重至哉言乎信能此則吾心即造化也殺之而不怨利之而不庸已不勞而萬物服矣乃知孔明長嘯艸廬時其所講不在伊

呂下杜少陵云伯仲之間見伊呂指揮若定失蕭曹可謂識孔明心事矣或謂既比之以伊呂矣又比之以蕭曹何也余曰不然下句蓋惜其指揮未定而死耳使其指揮若定則雖蕭曹且不能當况司馬仲達乎指揮蓋措置經畫也如兵民雜耕留屯久駐之類失猶無也故末句有志決身殲之歎

韓范用兵

郭仲晦云用兵以持重為貴蓋知彼知己先為不可勝以待敵之可勝此百戰百勝之術也昔韓范二公在五路韓公力於戰范公則不然曰吾唯知練兵選將積穀豐財而已余觀東軒筆錄載韓公欲五路進兵以襲平

夏范公不可韓公遣尹師魯至慶州約進兵范公曰我師新敗士卒氣沮但當謹守以觀其變豈可輕兵深入師魯歎曰公於此乃不及韓公也韓公嘗云大凡用兵當先置勝負於度外公何區區過慎如此范公曰大軍一動萬命所懸乃可置於度外乎師魯不能強而還韓公遂舉兵次好水川元昊設覆我師陷沒大將任福死之韓公遽還至半塗亾者之父兄妻子數千人號於馬首持故衣紙錢招魂而哭曰汝昔從招討出征今招討歸而汝死矣汝之魂識亦能從招討以歸乎哀慟之聲震天地韓公掩泣駐馬不能進范公聞之歎曰當是時難置勝負於度外也國朝人物當以范文正為第一富

韓皆不及富公欲誅晁仲約其見亦不逮范公余嘗有
詩云奮髯要斬高郵守攘臂甘驅好水軍到得繞牀停
轡日始知心服范希文

天佑忠賢

劉元城貶梅州章惇輩必欲殺之郡有土豪兇人也以
貨得官往來京師見章惇自言能殺元城惇大喜即除
本路轉運判官其人驅車速還及境郡守遣人告元城
元城畧處置後事與客笑談飲酒以待之至夜半忽聞
鍾聲問之則其人忽嘔血死矣秦檜晚年嘗一夕秉燭
獨入小閣治文書至夜分蓋欲盡殺張德遠胡邦衡諸
君子凡十一人區處既定只俟明早奏行之四更忽得

疾數日而卒檜父嘗為靜江府古縣令守紳胡舜陟欲
為檜父立祠於縣以為逢迎計縣令高登剛正士也堅
不奉命舜陟大怒文致其罪送獄鍛鍊備極慘毒登幾
不能堪未數日舜陟忽殂登乃獲免近時大理評事胡
夢昱以直言貶象郡過桂林帥錢宏祖欲害之未及有
所施行亦暴亡嗚呼謂天不佑忠賢可乎

齊人歸女樂

朱文公云齊人歸女樂說者謂受女樂必怠於政事故
孔子遂行然以史記觀之又似夫子懼其讒毀而去如
曰彼婦之口可以出走是已魯仲連論帝秦之害亦曰
彼又將使其子女讒妾為諸侯妃處梁之宮梁君安得

晏然而已乎想當時列國多此等事故夫子不得不星
夜急走余謂齊人但欲盡魯君之心君心既盡則所謂
怠於政事聽讒嫉賢之事自然色三有之楊誠齋云人
主之治天下必先正其治之主人臣之相其君必先
正其人主之主而小人敵國之欲傾人之國也必先敗
其人主之主而已齊人懲於夾谷而謀魯也不以齊謀
魯也以魯謀魯也魯以女樂罷朝而孔子行則先敗其
用孔子之主也孰爲用孔子之主非魯君之心乎

張魏公討苗劉

苗傅劉正彥之亂張魏公在秀州謀舉勤王之帥苗劉
偽詔至大赦厚犒諸軍公潛於府庫中尋舊詔書令人

駝往十數里外易其詔既至今僚屬宣詔但爲撫諭之
詞略張於譙樓旋即歛之大犒諸軍群情賴以不搖時
張俊亦在秀州公深結之會韓世忠舟師亦至公與世
忠對哭因饗後世忠將士呼諸將校至前抗聲問曰今
日之事孰逆孰順皆對曰賊逆我順又曰若浚此舉違
天悖人可取浚頭歸苗傅不然一有退縮悉以軍法從
事衆皆感憤遂勒兵行次臨平逆黨屯拒不得前世忠
等搏戰大破之傅正彥遁入闕追獲斬首拜公知樞密
院事時年纔三十二

贈頭陀詩

楊誠齋贈抄經頭陀詩云刺血抄經柰若何十年依舊

一頭陀袈裟未着言多事着了袈裟事更多今世儒生
竭半生之精力以應舉覓官幸而得之便指爲富貴安
逸之媒非特於學問切已事不知盡心而書冊亦幾絕
交如韓昌黎所謂墻角君看短檠棄陳后山所謂一登
吏部選筆硯隨掃除者多矣是未知着了袈裟之事更
多也余同年李南金登第後畫師以冠裳寫其真南金
題詩云落魄江湖十二年布衫闊袖裹風煙如今各樣
新裝束典却清狂賣却顛雖一時戲語然知紳裳之束
縛非韋布比而加意檢束亦自有味

鶴林玉露卷之八

